

四庫全書

經部

欽定四庫全書

經部
禮記纂言卷七

詳校官通政使_臣夢吉

給事中_臣溫常綬覆勘

總校官編修_臣王燕緒

校對官中書_臣潘奕雋

謄錄監生_臣汪元亮

欽定四庫全書

禮記纂言卷七

元 吳澄 撰

王制

王制者王者治天下之法制也漢文帝令博士諸生采集秦以前古書而作此篇然雜取傳記其間與周官及孟子不能悉同故鄭注或謂之殷制或謂之夏制亦意之而已矣

王者之制祿爵公侯伯子男凡五等諸侯之上大夫卿下大夫上士中士下士凡五等

鄭氏曰祿所食爵秩次也上大夫曰卿二五象五行剛柔十日孔氏曰凡王者之制其食祿受爵之人

南面之君有公侯伯子男凡五等法五行剛日甲丙戊庚壬其諸侯之下北面之臣有上大夫卿有下大夫有上士有中士有下士凡五等法五行柔日乙丁己辛癸也公侯伯子男獨以侯稱者舉中而言上大夫即卿卿下惟有下大夫而下文卿外更有上大

○制三公一命卷若有加則賜也不過九命次國之君不過七命小國之君不過五命

卷音衮

鄭氏曰卷衮通三公八命矣復加一命則服龍衮與王者之後同多於此則賜非命服也周禮曰諸公之服自衮冕而下如王之服孔氏曰此篇皆王者之制於此特言制者以三公位尊又加一命其事極重故記者特云制也三公八命身著鷩冕若加一命則為上公而著衮冕故云一命卷九命龍卷之外依制不

合有其服若有加益者是君之特賜非禮法之常也
澄曰不過九命謂大國公爵也王者之後及天子三
公出封畿內者皆九命服九章九旒之衮冕次國之
君謂侯伯也及天子之卿出封者皆七命服七章七
旒之鷩冕小國之君謂子男也及天子之大夫出封
者皆五命服五章五旒之毳冕然侯亦大國也而不
過七命何也蓋侯在公之下伯之上其爵七命雖下
同次國之伯其祿受地百里則上同大國之公故得
與公同稱大國者從其祿之重者而稱也按此記文
蓋謂天子之三公八命服鷩冕而已其或制加一命
為九命而服卷冕此乃王者之後上公所服而非天
子三公所得服若有加此者則出於君賜之特恩故
云若有加則賜也所謂三公出封加一等是也三公
朝之重臣出封之時特恩所賜然亦不過九命注疏
以龍卷之外有所加為特賜非也夫人臣之服至於
龍卷極矣無容再有所加龍卷之外有加則是十二

章也天子豈可
以賜其臣哉

大國之卿不過三命下卿再命小國之卿與下大夫一

命

鄭氏曰不著次國之卿者以大國之下互明之此卿
命則異大夫皆同周禮公侯伯之卿三命其大夫再
命子男之卿再命其大夫一命孔氏曰大國上卿三
命下卿再命則知次國之卿再命下卿一命小國上
下卿並皆一命也方氏曰周官典命言
諸臣之命與此不同者此非周制故也

○天子三公九卿二十七大夫八十一元士

鄭氏曰此夏制也明堂位曰夏后氏官百舉成數也
孔氏曰王制之文鄭皆以為殷法此獨云夏制者以

明堂位殷官二百與此百二十數不相當周官又三百六十澄按記者雜取諸書成篇故不皆與周制同今難追考矣

大國三卿皆命於天子下大夫五人上士二十七人次國三卿二卿命於天子一卿命於其君下大夫五人上士二十七人小國二卿皆命於其君下大夫五人上士二十七人

孔氏曰崔氏云大國三卿者依周制而言謂立司徒兼冢宰之事立司馬兼宗伯之事立司空兼司寇之事三卿命於天子則大夫以下其君自命之也大夫何以五人謂司徒之下置小卿二人一是小宰一是

小司徒司空之下亦置二小卿一是小司寇一是小司空司馬之下惟置一小卿小司馬也公羊傳何休注云古者諸侯有司徒司空上卿各一小卿各二司馬事省上下卿各一又周官冢宰施典于邦國設其參傳其伍鄭注參謂卿三人伍謂大夫五人鄭氏曰命於天子者天子選用之如今詔書除吏小國亦三卿一卿命於天子二卿命於其君此文似脫誤或者欲見畿內之國二卿與澄按下文小國之上卿位當大國之中中當其上大夫下當其下大夫則是小國亦有上中下三卿而此云小國二卿鄭氏疑為文脫然誠

其有中士下士者數各居其上之三分

分陸農師讀去聲

此十五字舊本次于下當其下大夫之下故鄭氏通解為並會之序且謂大國之士為上次國之士為中

小國之士為下而數各居其上之三分一句說竟不通唯方陸胡之說得之三分字音及其人數陸氏為優今既次此文於上士二十七人之下則文義益明矣其上之上指上士而言二十七人者上士之數若二分其數則為五十四人三分其數則為八十一人也方氏曰言三等之國止曰上士二十七人則知中下之士諸侯之國或有或亡矣故以其有言之其有者一有一亡之辭也山陰陸氏曰上士二十七人而未有中士下士之數故言之如此三分讀如去聲謂上士二十七人則中士下士各八十一人廬陵胡氏曰中士倍下士上士倍中士諸侯之國自有上中下三等之士也鄭以大國士為上士次國士為中士小國士為下士誤矣

○次國之上卿位當大國之中中當其下下當其上大

夫小國之上卿位當大國之下卿中當其上下大夫當其下大夫

廬陵胡氏曰此臧宣叔之言也鄭氏曰此諸侯使卿大夫規聘並會之序其爵位同小國在下爵異國在上爾孔氏曰爵同謂同作卿則小國之卿在大國之卿下爵異謂大國是大夫小國是卿則小國之卿固當在大國大夫之上方氏曰三等之國其地與君互降一等故其卿大夫位之所當亦互降一等焉上大

夫即卿矣有上中下卿而又有上大夫者蓋下大夫之上者也

右記制爵凡四節

天子之田方千里公侯田方百里伯七十里子男五十

里不能五十里者不合於天子附於諸侯曰附庸

馬氏曰普天之下莫非王土而天子兼有之故天子之田方千里所以祿畿內之臣也必千里者示其本大而末細猶身之運臂臂之使指不千里不足以服天下之諸侯也降於天子則公侯懿公侯田方百里不百里則朝聘會遇之煩有所不給也至於伯則又有救焉蓋其國小其爵卑而子男亦如之故伯七十里子男五十里澄曰方千里者一畿之地百同其田百萬井九百萬夫也方百里者一同之地百成其田萬井九萬夫也七十里者四十九成之地其田四十九百井四萬四千一百夫也五十里者二十五成之地其田二千五百井二萬二千五百夫也不能五十里者所受地少不能及五十里之數也李氏曰千里得方百里者百百里得方十里者百七十里得方十里者四十九五十里得方十里者二十五伯之田倍

子男公侯之田倍伯天子之田百公侯孔氏曰王者之後稱公大國稱侯皆千乘地方百里其方七十里者倍減於百里方五十里者倍減於七十里轉相半以別優劣不合者謂不得與諸侯集合朝會天子也庸城也小國之城不能自通以其國事附於大國故曰附庸也

天子之三公之田視公侯天子之卿視伯天子之大夫視子男天子之元士視附庸

鄭氏曰視猶比也澄曰孟子謂天子之卿受地視侯大夫受地視伯元士受地視子男與此不同蓋孟子當諸侯去籍之時姑以意言其大畧而已疑王制所記為得之也

○凡四海之內九州州方千里州建百里之國三十七

十里之國六十五十里之國百有二十凡二百一十國
名山大澤不以封其餘以為附庸閒田八州州二百一

十國

聞音閑
後同

鄭氏曰建立也立大國三十三公也立次國六十六
卿也立小國百二十十二小卿也名山大澤不以
封者與民同財不得障管亦賦稅之而已孔氏曰十
三公者天子縣內三公之國方百里畿外大國亦方
百里三十大國擬於三公之地者九十也十六卿者
畿內六卿之地方七十里畿外次國亦方七十里六
十次國擬於六卿之地者九十也十二小卿者畿
內大夫之國方五十里畿外小國亦方五十里百二
十小國擬於十二小卿之地者九十也十二小卿上
重有十字一州凡二百一十國其外餘地若封人附

於大國謂之附庸若未封人謂之閒田名山大澤若諸侯為主則民不得取其財物故不以封諸侯使不得障塞管領禁民共取但隨其所取賦稅而已馬氏曰自唐至周其土地之廣狹斷長補短大界皆方三千餘八州各為九則方千里者九也其一為天子之縣內餘八州各方千里一州建百里之國三十公侯之國也七十里之國六十伯之國也五十里之國百有二十子男之國也合二百一十國而計之猶餘方百里者十有奇以為附庸閒田鄭氏以為殷制又以為周公斥大九州之界方七千里者其說不經長樂陳氏曰夏之甸侯綏允三服每服一面五百里為方三千里周之侯甸男采衛允五服每服兩面共五百里五服方二千五百里與王畿千里為三千五百里周公斥大中國不過五百里而已名山大川皆天子使吏治之而入其貢賦九州川浸山藪各有職方不屬諸侯之版春秋諸侯或兼而擅之齊韓山海晉私邠

瑕宋有孟諸楚有雲夢皆不入於王官故孔子作春秋虎牢不係鄭沙麓不係晉緣陵不係杞楚邱不係衛蓋別天子之守地也夫先王之不以封將以弭諸侯之侈心而與民共利也

天子之縣內方百里之國九七十里之國二十有一五十里之國六十有三凡九十三國名山大澤不以盼其餘以祿士以為閒田

盼音班

鄭氏曰畿內大國九者三公之田三為有致仕者副之為六也其餘三待封王之子弟次國二十一者卿之田六亦為有致仕者副之為十二又三為三孤之田其餘六亦待封王之子弟小國六十三大夫之田二十七亦為有致仕者副之為五十四其餘九亦以待封王之子弟三孤之田不副者以其無職佐雖致

仕猶可即而謀焉盼讀為班孔氏曰三公在朝既有正田今既致仕不可仍食三公采邑身又見存不可全無其地故公卿大夫皆有正職之田又有致仕副邑也按周禮三公雖無正職猶列於官參六卿之事故司徒云卿老二卿則公一人三孤則不列於官故事故無致仕之副名山大澤畿外列土諸侯有封建之義故云不以封畿內之臣既不世位有盼賜之義故云不以盼亦為與民共財不障管也其餘以祿士以為閒田者謂九十三國之餘下文所云是也以九十三國封公卿大夫故此特云以祿士以祿士者謂無地之士給之地以當其祿不得為采邑也若公卿之子父死之後既不世爵得食父祿則此祿士包之也凡祿士之外並為閒田則周禮之公邑也不云附庸者以縣內無附庸也畿外諸侯有附庸故閒田少畿內每須盼賜故閒田多長樂陳氏曰周官有在鄉

之縣有在遂之縣有采邑之縣有閒田之縣故王畿
謂之縣縣內方百里之國九三公所視公侯之地也
七十里之國二十有一卿所視伯之地也五十里之
國六十有三大夫所視子男之地也公卿大夫不謂
之采邑而謂之國者人臣謹度以事上則全於臣道
制節以御下則兼於君道自臣道而言雖國亦謂之
家孟子十乘稱家是也自君道而言雖邑亦謂之國
此采邑稱國是也山陰陸氏曰周官公所受田在大
都之疆地卿所受田在小都之縣地大夫所受田在
采邑之稍地此所謂縣內舉中言之也然則元士受
地於公邑之甸地可知此其大凡也其地有餘不足
蓋有通法存焉雖卿或在疆地雖大夫或在縣地取
足於封而已廬陵胡氏曰大國餘六次國餘十五小
國餘三十七以待盼賜三公卿大夫之有功者亦或
待王之別有所封爾鄭云為有致仕者副之又其餘
以待封王之子弟於經何以見之且公卿大夫在位

則有定員若致仕則或多或少或定數今云公之致仕者三卿之致仕者六大夫之致仕者二十七限以員數恐非通論方氏曰名山若魯之泰山晉之梁山之類大澤若豫之孟諸楚之雲夢之類山澤之大者則必有其名焉於山曰名於澤曰大蓋互言之爾名山大澤神物之所藏寶貨之所出非外內諸侯得專而有之故於外則不以封於內則不以盼外則度土而封之使傳嗣也故曰封內則分邑以盼之使食祿而已故曰盼延平周氏曰封以土言盼以恩言祿士元士之采邑也故繼之以天子之元士不與

凡九州千七百七十三國天子之元士諸侯之附庸不

與

與音預

廬陵胡氏曰洛誥傳云天下諸侯來進受命於周退見文武尸者千七百七十三諸侯又孝經說曰周千

八百諸侯布列五千里內又異義公羊說殷三千諸侯周千八百諸侯則周制正與此千七百七十三國之數合夫孝經緯及異義公羊說固不足盡信鄭不據周必以此為殷制何也鄭氏曰不與不在數中也

○方千里者為方百里者百封方百里者三十國其餘方百里者七十又封方七十里者六十為方百里者二十九方十里者四十其餘方百里者四十方十里者六十又封方五十里者百二十為方百里者三十其餘方百里者十方十里者六十名山大澤不以封其餘以為附庸閒田諸侯之有功者取於閒田以祿之其有削地

者歸之閒田

此覆解上文八州封國之制也孔氏曰凡千里之方以開方計之方百里者凡有一百封方百里大國三十國以百中去三十故其餘方百里者七十又封方七十里次國六十國為方百里者二十九方十里者四十凡百里之方開方計之為十里之方百其七十里之國一用十里之方四十九七十里之國二則用十里之方九十八則一個百里為七十里之國二剩十里之方二然則二十個七十里之國用百里之方十剩十里之方二十七十里之國六十用百里之方三十剩十里之方六十今就百里之方三十之中抽去十里之方六十是用百里之方二十九方十里者四十故其餘方百里者四十方十里者六十又封方五十里小國百二十國凡百里之方一封五十里之國四則十个百里之方封五十里之國四十今小國

百二十故用百里之方三十則其餘方百里者十方
十里者六十以為附庸閒田方氏曰諸侯之有功者
取於閒田以祿之即巡守之禮言有功德於民者加
地是也其有削地者歸之閒田即巡守之禮言不敬
者君削以
地是也

天子之縣內方千里者為方百里者百封方百里者九
其餘方百里者九十一又封方七十里者二十一為方
百里者十方十里者二十九其餘方百里者八十方十
里者七十一又封方五十里者六十三為方百里者十
五方十里者七十五其餘方百里者六十四方十里者

九十六

此覆解上文縣內封國之制也孔氏曰天子縣內地
方千里為方百里者百既用九個擬封百里之國故
其餘方百里者九十一也又封方七十里之次國二
十一凡百里之方十為七十里之國二十剩十里之
方二十今以十里之方二十又更取其外十里之方
二十九添前二十為四十九為七十里之國一是共
二十一國也總用百里之方十十里之方二十九故
其餘方百里者八十方十里者七十一也又封方五
十里之小國六十三凡百里之方一為五十里之國四
則百里之方十為五十里之國四十又百里之方五
為五十里之國二十總為五十里之國六十更有五
十里之國三凡一個五十里之國用十里之方二十
五則三個五十里國總用十里之方七十五是用地
方百里者一十五方十里者七十五故其餘方百里

者七十四方十里者九十六然畿外十里封國之外
所餘地少其畿內十里所餘地多者以畿外之土本
擬封建諸侯故國數多餘地少畿內本供天子又有
郊關鄉遂準擬公卿王子弟采邑故建國數少餘地
多方氏曰此畿內不言名山大
澤與祿士閒田則以前見之

○千里之外設方伯五國以為屬屬有長十國以為連
連有帥三十國以為卒卒有正二百一十國以為州州
有伯八州八伯五十六正百六十八帥三百三十六長
八伯各以其屬屬於天子之老二人分天下以為左右

曰二伯

長之兩切帥色
類切卒子忽切

鄭氏曰屬連卒州猶聚也伯帥正亦長也凡長皆因賢侯為之殷之州長曰伯虞夏及周皆曰牧老謂上公周禮曰九命作伯春秋傳曰自陝以東周公主之自陝以西召公主之孔氏曰屬是繫屬連是連接卒是卒伍州是聚居故總云聚也伯帥正俱是長但異其名因其州內賢侯為之長非州外別取州牧也山陰陸氏曰屬以官之六屬制名言大事則從其長小事則專達也連以聯制名言以授邦職以役國事如聯也卒以卒制名言以此追胥以全貢賦如卒也長之以仁故屬有長帥之以知故連有帥正之以義故卒有正至伯則於一州為長其仁其知與義可知也彼正以下吾驅之而已是故或謂之牧若二伯又有大於此者焉能充此任者其殆聖乎周公是也召公猶有慚德八州八伯蓋天子之縣內不在此數澄曰方伯謂東方西方二伯也千里之外八州諸侯州各有牧以統之於外矣八牧所牧之州其四在西方其

四在東方又以王朝三公設為二伯以總之於內焉
西方諸侯西伯總之東方諸侯東伯總之周書言大
保率西方諸侯畢公率東方諸侯是也千里之外設
方伯者謂千里之外八州之侯設方伯於內以總之
非謂所設方伯在千里之外也下云州有伯此伯乃
一州之牧爾以其統一州之諸侯猶方伯總一方之
諸侯也故州牧
亦可名曰州伯

天子使其大夫為三監監於方伯之國國三人

監古暨切監於

古衡切後同

鄭氏曰使佐方伯領諸侯孔氏曰天子使在朝之大
夫往監於方伯之國每一州三人三八二十四人崔
氏云此謂殷之方伯皆有三人佐其伯周則於牧下
置二伯亦或因殷使大夫為三監尚書管叔蔡叔霍

叔為三監與此別澄按孟子言周公使管叔監殷書序亦言三監及淮夷叛說三監者或以為武庚管叔蔡叔或以為管叔蔡叔霍叔皆非也蓋武王分殷之故地為邶鄘衛三國而使管叔蔡叔康叔君之管叔君邶蔡叔君鄘後因叛而廢其國惟衛康叔之國獨存書言王啟監周官言立其監監者皆謂諸侯之君非謂別以人而監侯國也此記蓋因邶鄘衛為殷地之三監而誤既云監方伯之國而疏云三八二十四人則是監州伯之國矣誤稱州伯為方伯也崔謂周於牧下置二伯其說愈謬夫二伯為八州牧之統豈於牧下而置哉注疏之說皆無稽陵陽李氏曰牧伯皆諸侯之賢者天子所親倚豈復使內臣監之

○天子百里之內以共官千里之內以為御

共音恭

馬氏曰百里之內去王城五十里而四面相距則百里也千里之內去王城五百里而四面相距則千里

也官者官府之所用其用輕故取百里近地所出者
給之御者天子之所用其用重故取千里遠地所出
者給之山陰陸氏曰百里之內以共官府所用若禹
貢百里賦納總千里之內以為天子御府所用若禹
貢四百里粟五百里米孔注謂納精者少麤者多溢
曰按周之法則百里之內乃近郊之地士工商所受
田以及國外之場園國中之廬里所取亦寡豈特以
是而共官之用乎千里之內則大都小都家邑公邑
以至六遂六鄉有供王之賦有農田之稅御用之物
蓋於此乎取也然記者不知何據而云長樂陳氏曰
周官大府關市之賦以待王之膳服邦中之賦以待
賓客四郊之賦以待稍秣家削之賦以待匪頒邦甸
之賦以待工事邦縣之賦以待幣帛邦都之賦以待
祭祀山澤之賦以待喪紀或以其地之所便或以其
地之所宜或以其類之所從然皆未嘗以遠物待乎
近以近物待乎遠豈以近者供官遠者為御乎又大

宰之制國用必合王府之財為之調度乃可豈官府之所供止於百里膳服之御必千里乎臨川王氏曰此一說不知是何時於它經亦不見恐於事亦難如此蓋當合王府之財而通其調度乃可也

千里之內曰甸千里之外曰采曰流

此約禹貢五服之文而為記千里之內曰甸所謂五百里甸服也一面各五百里東西南北相距為千里之內十里之外謂自侯服至荒服也侯服之別有三曰采曰男邦曰諸侯綏服之別有二曰揆文教曰奮武衛要服之別有二曰夷曰蔡荒服之別有二曰蠻曰流內之近者始於采外之遠者終於流故舉其始終二者以包七者於中也長樂陳氏曰甸為貢甸服也采則侯服之百里采也流則荒服之二百里流也李氏曰采于侯服為尤近流于荒服為極遠九州舉內以見外四海舉外以包內

○制農田百畝百畝之分上農夫食九人其次食八人其次食七人其次食六人下農夫食五人庶人在官者其祿以是為差也

分去聲食音嗣下同
差初佳初宜二切

鄭氏曰農夫皆受田於公田肥瘠有五等收入不同也庶人在官謂府史之屬官長所除不命於天子國君者分或為糞孔氏曰地有九等故周禮大司徒上地家七人中地家六人下地家五人一家男女七人以上則授之以上地所養者衆也男女五人以下則授之以下地所養者寡也以七人六人五人為率者舉中而言家七人者中地之上家六人者中地之中家五人者中地之下上地之上家十人上地之中家九人上地之下家八人下地之上家四人下地之中家三人下地之下家二人從十人至二人凡九等此

惟自九人而下至五人五等者大司徒所云農夫授田實有九等此據準庶人在官之祿最下者猶五人故從上農夫至五、人而已司徒上地家十人此云上農夫食九人者上中之地亦為上地不言上上者欲取九人當下士祿也方氏曰府史胥徒之類其田則載師所謂官田也而又有工有賈有奄有奚祿之多寡以農為差多者不過得食九人之祿寡者不下得食五人之祿此言百畝之分孟子言百畝之糞者蓋分以均之之法出乎上糞以治之之力出乎下其言互相備也

諸侯之下士視上農夫祿足以待其耕也中士倍下士上士倍中士下大夫倍上士卿四大夫祿君十卿祿次國之卿三大夫祿君十卿祿小國之卿倍大夫祿君十

卿祿

鄭氏曰此班祿尊卑之差孔氏曰大夫以下位卑祿小故大小國不殊卿與君祿重位尊故祿隨國之大小為節自下士至小國之卿倍大夫祿皆據無采地者言之方氏曰下言次國小國上言諸侯者謂大國大國公侯方百里之國也次國伯爵方七十里之國也小國子男方五十里之國也下士視上農夫蓋以一家所耕之田而祿下士之家僅足以代其耕而已為其從事於公不服從事於私故也

○諸侯之下士祿食九人中士食十八人上士食三十
六人下大夫食七十二人卿食二百八十八人君食二
千八百八十人次國之卿食二百一十六人君食二千

一百六十人小國之卿食百四十四人君食千四百四十人次國之卿命於其君者如小國之卿

此覆解上文班祿之制孔氏曰諸侯下士視上農夫故食九人中士倍下士故食十八人上士倍中士故食三十六人下大夫倍上士則食七十二人卿大夫祿則食二百八十八人君十卿祿則食二千八百八十人次國大夫以下亦如大國大夫惟卿得三大夫祿則次國之卿食二百一十六人次國之君亦十卿祿則食二千一百六十人小國大夫以下亦如大國大夫而卿則二大夫祿則小國之卿食百四十四人小國之君亦十卿祿則食千四百四十人大國三卿皆命於天子則其祿各食二百八十八人次國三卿二卿命於天子者祿各食二百一十六人而一卿命於其君者為賤祿不可等天子命者故視小國卿

食一百四十四人也。若子男小國一卿命於天子而二卿命於其君者，祿如天子命卿無以異。蓋國小故不足差降，或云視大夫也。應氏曰：由下士以至於君，其祿愈厚，則所食愈衆，豈非以人徒服役漸增而漸廣與？然由卿以下皆服役乎君者也，既各給之田以爲祿矣，君祿之所入豈盡以食二千八百八十人哉？以二千八百八十人之食而養一君，所養極其厚，亦欲居人上者知吾之所奉合衆力而共爲之，則必思有以稱此，且不至壅利以自私而必推己以養人也。

天子之大夫爲三監，監於諸侯之國者，其祿視諸侯之卿。其爵視次國之君，其祿取之於方伯之地。

方氏曰：前言監於方伯之國，此言監於諸侯之國，其實一也。以其監方伯故，其祿取之於方伯之地，祿視

諸侯之卿者以大夫之位所養不大厚也爵視次國之卿者以三監之職權不可不重也澄按三監古無之記者蓋誤又因上文言君卿大夫士之祿所食多寡而生此文殆不足信方氏從而臆說爾

方伯為朝天子皆有湯沐之邑於天子之縣內視元士

為去聲
朝音潮

鄭氏曰湯沐之邑給齊戒潔清之用浴用湯沐用潘孔氏曰按前文云不能五十里曰附庸又云天子元士視附庸湯沐之邑視元士亦五十里以下左氏說諸侯有功德於王室京師有朝宿之邑泰山有湯沐之邑魯周公之後鄭宣王母弟有湯沐邑其餘則否而公羊說謂諸侯朝天子皆有朝宿之邑許慎以為若如此則周千八百諸侯盡京師地不能容之不合事理之宜

○天子之縣內諸侯祿也外諸侯嗣也

鄭氏曰選賢置之於位其國之祿如諸侯不得世外諸侯有功乃封之使之世也冠禮記曰繼世以立諸侯象賢也孔氏曰畿內公卿大夫之子父死得食父之故采邑不得繼父為公卿大夫蓋世其位則權并一姓妨塞賢路故世祿不世位有罪乃奪其祿若有賢德則復父位畿外諸侯嘗有大功封之以報其勞効世世象賢故子得襲父位傳嗣其國也石林葉氏曰內之公卿大夫其受田視公侯伯子男固亦通稱為諸侯也內世祿而公卿大夫之子必賢而後得世爵外世爵而諸侯之子自非大惡猶得襲位蓋公卿大夫有功德出封為諸侯是外之世爵者乃內之世祿臣也至諸侯有功德亦入而為公卿是在內之世祿者或在外之世爵諸侯也

諸侯世子世國大夫不世爵使以德爵以功未賜爵視天子之元士以居其國諸侯之大夫不世爵祿

鄭氏曰世子世國象賢也大夫謂縣內及列國諸侯為天子大夫者不世爵而世祿辟賢也以君其國列國及縣內之國也孔氏曰下云諸侯之大夫則此大夫是天子大夫也公卿大夫總言大夫以包之列國諸侯及縣內諸侯既死其子未得賜爵其衣服禮制視天子元士各君其本國畿內諸侯有太功德元子出封畿外則王命次子守其采邑若其賢才則世為公卿周公召公之屬是也諸侯降於天子故其大夫不世爵祿若有大功德亦得世之程子曰古者使以德爵以功世祿而不世官故賢才衆而庶績成及周之衰公卿大夫皆世官政由是敗矣長樂陳氏曰諸侯世子世國即外諸侯嗣也大夫不世爵即內諸侯

祿也內諸侯不止於大夫此止言大夫以卿魚公而
上大夫為卿故也周官大司徒以賢制爵以庸制祿
司士以德詔爵以功詔祿此云使以德爵以功者別
而言之爵主德祿主功合而言之必使以試其德及
有功而後爵之也延平周氏曰天子之大夫世祿不
世爵故其子之未賜爵者則其禮視元士而其祿即
大夫也新安王氏曰荀伯為司徒衛侯為司寇齊侯
呂伋為虎賁是以諸侯入天子之國為卿大夫也在
其國為世子則可以世國入為大夫則不可以世爵
蓋以德而使之待其功而爵之非子孫所得繼也未
賜爵此乃外之列國非畿內有采地之公卿也君薨
世子嗣位以君其國除服來朝以士服見於天子天
子命之則授以冕服於是始以諸侯而臨臣民或未
來朝天子亦遣使以冕服就賜之方氏曰未賜爵視
天子之元士以君其國者謂世子世國之初也視禮
儀之數視之也且諸侯之適子未誓以皮帛繼子男

則未賜爵視天子之元士者以元士視附庸而繼子男故也諸侯之大夫不世爵祿則以其德又降於天子之大夫故也澄曰未賜爵承上文世國者言之謂諸侯之世子雖得世國然世國之初天子未賜爵則猶未得為諸侯也諸侯之大夫承上文不世爵者言之謂天子之大夫雖不世爵而猶得世祿若諸侯之大夫則并祿亦不得世矣

右記制祿凡八節

古者以周尺八尺為步今以周尺六尺四寸為步古者百畝當今東田百四十六畝三十步古者百里當今百二十一里六十步四尺二寸二分

鄭氏曰周尺之數未詳聞也按禮制周猶以十寸為尺蓋六國時多變亂法度或言周尺八寸則步更為八八六十四寸以此計之古者百畝當今百五十六畝二十五步古者百里當今百二十五里孔氏曰古者八寸為尺今以周尺八尺為步則一步有六尺四寸今以周尺六尺四寸為步則一步有五十二寸是今步比古步每步剝出一十二寸以此計之則古者百畝當今東田百五十二畝七十一步有餘與此百四十六畝三十步不相應也又今每步剝古步十二寸以此計之則古之百里當今百二十三里一百一十五步二十寸與此百二十一里六十步四十二寸二分又不相應周猶以十寸為尺今云以周尺六尺四寸為步蓋六國時多變亂法度謂周尺八寸也即以古周尺十寸為尺八尺為步則步八十寸若以今周尺八寸為尺八尺為步則今步少於古步一十六寸也是今步別剝六十寸以此古步又以今周尺八

寸八尺為步外剩十六寸而計之則古之四步剩出
今之一步古之四十步為今之五十步古之八十步
為今之一百步計古一百畝之田長百步得今田一
百二十五步是今田每畝之上剩出二十五步則方
百畝之田從北嚮南每畝剩二十五步總為二千五
百步從東嚮西每畝二十五步亦總為二千五百步
相併為五千步是總為五十畝又西南一角南北長
二十五步應南畔所剩之度東西亦長二十五步應
西畔所剩之度計方二十五步開方乘之總積得六
百二十五步六百步則為六畝餘有二十五步故云
古者百畝當今百五十六畝二十五步也又古四步
剩今一步則古者四里剩今一里為五里則古者四
十里剩今為十里為五十里則古者八十里剩今二
十里總為百里是古者八十里為今百里今之百里
之外猶有古之二十里四里剩一里其古二十里為
今之二十五里故云古者百里當今百二十五里長

樂陳氏曰璧羨以起度考工記璧羨度尺好三寸以爲度璧徑九寸羨而長之從十寸廣八寸同謂之度尺則周之法十寸八寸皆爲尺也考工記於按言十有二寸於鎮圭言尺有二寸此十寸尺之證也說文曰咫八寸周尺也此云周尺八尺爲步今以周六尺四寸爲步六尺四寸及八尺爾此八寸尺之證也隋書所載歷代尺有十五種蓋古尺廢後世長短異同之論遂不一也延平周氏曰後世之尺或以黍或以忽或以指然地之生黍有小大蠶之吐絲有巨細人之手有長短此步尺所以異同也

方一里者爲田九百畝方十里者爲方一里者百爲田九萬畝方百里者爲方十里者百爲田九十億畝方千里者爲方百里者百爲田九萬億畝

鄭氏曰一里方三百步億今十萬萬億今萬萬也孔氏曰步百為畝是長百步闊一步畝百為夫是一頃也長闊皆百步夫三為屋是三頃也闊三百步長一百步屋三為井是九百畝也長闊皆三百步是為方一里一个十里之方為四九萬畝十个十里之方為田九十萬畝方百里者為百个十里之方其田九百萬畝一億是十萬十億是百萬九百萬即是九十億畝也尹文子云百姓千品萬官億醜皆以數相十此小億也毛詩傳云數萬至萬曰億此大億也一个百里之方為田九十億畝十个百里之方為田九百億畝方千里者為百个百里之方其田九千億畝若以萬言之當云九萬萬畝此云九萬億畝億萬字相交涉遂誤萬萬為萬億皇氏曰億數不定或以萬萬為億或以十萬為億或以一萬為億此云萬億者祇是萬萬也六國時或將萬為億故云萬億

自恒山至于南河千里而近自南河至于江千里而近
自江至于衡山千里而遙自東河至于東海千里而遙
自東河至于西河千里而近自西河至于流沙千里而
遙西不盡流沙南不盡衡山東不盡東海北不盡恒山
凡四海之內斷長補短方三千里為田八千萬億一萬

億畝

斷音短

鄭氏曰恒山至南河冀州城南河至江豫州域江至
衡山荊州域東河至東海徐州域東河至西河亦冀
州域西河至流沙雍州域方三千里為田八千萬億
一萬億畝九州之大計也孔氏曰一州方千里九州

方三千里三三如九為方千里者九一个千里有九萬億畝九个千里九九八十一故有八十一萬億畝記文於八十整數之下云萬億是八十个萬億又云一萬億言又有一个萬億也方氏曰一萬億畝之上重有萬億二字蓋衍文爾皇氏曰千里而近者言其地稍近不滿千里也千里而遠者言其地稍遠不當也

方百里者為田九十億畝山陵林麓川澤溝瀆城郭宮

室塗巷三分去一其餘六十億畝

分去聲

鄭氏曰以一大國為率其餘所以授民也山足曰麓方氏曰九十億畝三而分之則各三十億畝去其一可耕之田四海之內不皆如此大畧然也

○古者公田藉而不稅市廛而不稅關譏而不征林麓川澤以時入而不禁夫圭田無征田里不粥墓地不請

藉在亦切

粥音育

孟子曰耕者助而不稅則天下之民皆悅而願耕於其野矣市廛而不征法而不廛則天下之商皆悅而願藏於其市矣關譏而不征則天下之旅皆悅而願出於其路矣又曰昔者文王之治岐也關市譏而不征澤梁無禁又曰卿以下必有圭田圭田五十畝餘夫二十五畝鄭氏曰藉之言借也借民力治公田美惡取於此不稅民之所自治也夏后氏五十而貢殷人七十而助周人百畝而徹所云古者謂殷時也廛市物邸舍稅其舍而不稅其物關譏異服譏異言征亦稅也周禮國凶札則無門關之征猶譏也田里墓

地皆受於公民不得私也孔氏曰一井之中九有九夫中央一夫為公田但借八家之力以治此公田不稅民之私田也市內空地曰廛使商人傳物於中稅其所舍之處不稅其在市所賣之物闕竟上門也譏謂呵察非違不稅行人之物竹木曰林林屬於山為麓注瀆曰川水鍾曰澤林麓川澤民庶須有采取隨時而入官不限禁之以時入如獮祭魚然後入澤梁也田地里邑既受之於公民不得粥賣冢墓之地公家所給族葬有常不得輒請求餘處澄曰夫圭田夫田謂餘夫所受二十五畝之田圭田謂卿以下所受五十畝之圭田也無征謂既不稅其所受亦不令助耕公田也程子曰一夫上父母下妻子以五口八口為率受田百畝如有弟是餘夫也年十六別受田二十畝俟其壯而有室然後更受百畝之田朱子曰圭潔也以奉祭祀百畝常制之外又有餘夫之田所以厚野人也世祿常制之外又有圭田所以厚君子

也方氏曰餘夫之田無征所以優單弱圭田無征所以優賢能長樂陳氏曰公田籍而不稅所以寬農市廛而不稅所以寬商關譏而不征所以寬旅山澤以時入而不禁所以寬萬民餘夫夫外之田也圭田祿外之田也祿外之田半百畝夫外之田又半之無征者征蓋稅歛之總名也田里鄉遂官之所頒不可以粥不粥則生者無相兼并而民無憾於養生墓地墓大夫之所掌不可以請不請則死者有所安厝而民無憾於送死頒之田里墓地仁也禁之以不粥不請義也

○司空執度度地居民山川沮澤時四時量地遠近興

事任力

度度上如字下大洛切沮將慮切

鄭氏曰司空冬官卿掌邦事者度丈尺也居民山川沮澤時四時者觀寒煖燥濕沮謂菜沛量地謂制邑井

之處興事謂築邑廬宿市也孔氏曰執丈尺之度以量度其地而居處其民觀山川高下沮澤浸潤之處山燥川與沮澤濕沮地是有水草之處草所生為菜水所生為沛又當以時候此四時知其寒煖九夫為井四井為邑堪造邑井之處謂平原之地沃衍之所也若山林藪澤則不堪邑井事言興則用力重難謂築邑城又築廬與宿及市也凡國野之道十里有廬三十里有宿五十里有市方氏曰山川沮澤之地利興必候四時之天氣時者候其時之謂量地遠近將以制邑也制邑必興役事興役事必任民力焉

○凡使民任老者之事食壯者之食用民之力歲不過三日

鄭氏曰凡使民寬其力饒其食用民之力謂治宮室城郭道渠也孔氏曰役法功程老則功少壯則功多

雖壯者限以老者之功程寬其力也康餽牲體壯者食多老者食少雖老者給以壯者之食料饒其食也使民治城郭道渠不得過三日月禮均人豐年旬用三日中年旬用二日無年旬用一日年歲不同雖豐不過三日也

○凡居民量地以制邑度地以居民地邑民居必參相得也無曠土無游民食節事時民咸安其居樂事勸功

尊君親上然後興學

樂音洛

地邑有廣狹民居有稀稠必參合量度使之相稱各得其宜若地廣民稀則有曠土矣地狹民稠則有游民矣食節謂制民之產使之足以仰事俯畜也事時謂上之興事必於農隙不奪農時也如此則民咸安

其居矣方氏曰量猶五量之量其多少足以知其所容度猶五度之度其長短足以知其所至故制邑曰量居民曰度然邑制之所容莫非民民居之所至莫非邑則邑亦可言度居亦可言量矣兩之為並三之為參地也民也長短多少不可相失也無曠土則地無遺利無游民則人無遺力曠言虛而無墾闢之功游言散而無興作之業也食節則無不足之患事時則無不及之務居民之道亦期其如此而已故教至於民咸安其居也樂事則不至於勞苦勸功則不由於勉強尊君則為臣者有遜志親上則在下者無離心上則不止於君凡在已上者皆是也教不可一日廢必待樂事勸功尊君親上然後興學者則以至此然後教學之道可致其詳也鄭氏曰興學立小學大學孔氏曰如此然後得興學民富而可教也

○凡居民材必因天地寒煖燥濕廣谷大川異制民生

其間者異俗剛柔輕重遲速異齊五味異和器械異制
衣服異宜脩其教不易其俗齊其政不易其宜

燥素老切異齊

才細切
和去聲

鄭氏曰因天地寒煖燥濕者使其材堪地氣也異制
謂其形象異俗謂其所好惡異齊謂其性情緩急異
和謂香臭與鹹苦異制謂作務之用異宜謂禮樂與
絺綌教謂禮義政謂刑禁澄曰民材謂人之生質也
地之氣所應不同而天氣或寒或煖天之氣所感不
同而地氣或燥或濕因天地之寒煖燥濕而各使生
質之能堪其氣者居之兩山之間衍然而深水流注
川者曰谷廣谷則兩山相去稍遠其中有隰皋之地
可居大川謂大川之上亦有可居者即墳衍之地也
異制謂有山有川之處其高深之形勢各異若裁制

而成然俗者民間習尚之所安也凡居民者中土平原之地為正廣谷大川地形地勢之制既異則其間之民受此地氣而生者其民俗之習尚自與平原之民異也剛柔輕重遲速謂氣稟之異稟陽之多者剛稟陰之多者柔輕重有陽而輕陰而重者亦有陰而輕陽而重者遲速有陰而遲陽而速者亦有陽而遲陰而速者人之氣稟大聚有此六者齊如五齊之齊雖不齊同而各有分齊也和謂調和制謂制作宜謂所便也氣稟不同故口所嗜之味各有所宜而異其調和身所用之器各有所宜而異其制作體所被之衣服與五味之和器械之制皆為各有所宜而異其和異制亦異宜也故以異宜終之費上二句脩謂其教皆明無所廢缺教即下章七教是也齊謂其政並舉無所參差政即下章八政是也以廣谷大川而言則地產有異而其習尚之所安各異其俗故雖導之以七教然亦不改易其所安之俗使之各得以安其

所安也以剛柔輕重遲速而言則天稟有異而其身口之所便各異其宜故雖正之以八政然亦不改易其所便之宜使之各得以宜其
所宜也此居民材之大凡也

中國戎夷五方之民皆有性也不可推移東方曰夷被髮文身有不火食者矣南方曰蠻雕題交趾有不火食者矣西方曰戎被髮衣皮有不粒食者矣北方曰狄衣羽毛穴居有不粒食者矣中國夷蠻戎狄皆有安居和味宜服利用備器五方之民言語不通嗜欲不同達其志通其欲東方曰寄南方曰象西方曰狄韞北方曰譯

衣去聲鞞

丁芳切

皆有性謂其生稟各不同不可推移謂其生稟一定而不可易如論語言上智下愚不移也東方曰夷以下言四夷異俗文身與雕題同衣皮與衣羽毛同此亦言其俗之大畧而已皆有安居和味宜服利用備器言五民之居處飲食衣服器用異宜也言語不通而嗜欲不相同則不能自言其所欲故必有譯言者達其志然後可以通其欲也寄象狄鞞譯言者之異名鄭氏曰五方之民性不可推移也氣使之然也雕文謂刻其肌以丹青涅之交趾臥則解足相鄉不火食地氣煖不為病也不粒食地氣寒少五穀也孔氏曰五方謂中國四夷舉戎夷則蠻狄可知文身謂以丹青文飾其身雕刻也題額也雕題謂以丹青雕刻其額非惟雕額亦文身也漢書地理志云越俗斷髮文身以辟蛟龍之害東方南方皆近海故俱文

身也趾足也璧臥時頭向外而足在內相交故云交趾不云被髮斷髮故也有不火食言亦有火食者西方無絲麻唯食禽獸故衣皮東北方多鳥故衣羽正北多羊故衣毛凝寒至盛林木又少故穴居中國四夷雖異各有所安之居所和之味所宜之服所利之用所備之器其事雖異各自充足也水土各異故言語不通好惡殊別故嗜欲不同帝王立此傳語之人曉達五方之志通傳五方之欲使相領解寄者傳寄外內言語象言放象外內之言狄鞮者鞮知也通傳夷狄之語與中國相知譯者陳也陳說外內之言此通傳四方語言也長樂陳氏曰寄象鞮譯周官象胥是也達其志通其欲象胥所謂協其言辭傳之寄言其寓於此象言其像於彼鞮言其屨譯言其語凡此皆互見也周官鞮師旄人鞮鞻氏教四夷之樂其名官鞮以其所服旄以其所執鞮鞻言其所履方氏曰題曰雕身曰文互言之兩安居謂所居異俗和味

謂五味異和宜服謂衣服異宜備器謂器械異制利用謂所利之用若居山不以魚鼈為禮居澤不以鹿豕為禮也馬氏曰志與欲言語之蘊言語者志欲之富達其志通其欲必在於言語之際故有道言語之官謂之寄

象狄鞮譯

右記度地居民凡六節

六禮冠昏喪祭鄉相見七教父子兄弟夫婦君臣長幼朋友賓客八政飲食衣服事為異別度量數制

別彼列切

六禮冠昏喪祭四者家之禮也鄉相見二者鄉之禮也儀禮有士冠禮士昏禮喪服士喪禮士虞禮士之祭有特牲饋食禮卿大夫之祭有少牢饋食禮鄉有鄉飲酒禮鄉射禮相見有士相見禮七教即五教也

兄弟別出為長幼朋友別出為賓主內則父子兄弟夫婦外則君臣長幼朋友賓主也鄭氏曰八政飲食為上衣服次之事為謂百工技藝也異別五方用器不同也度丈尺也量斗斛也數百十也制布帛幅廣狹也項氏曰飲食衣服度量數制六者易明獨事為異別注不能通事為者冢宰之九職司徒之十二事考工之六職皆司徒所頒以任民者也異別者司徒五地之常職方九土之宜王制中國四夷之俗皆司徒所辨以居民者也

○司徒脩六禮以節民性明七教以興民德齊八政以防淫一道德以同俗養耆老以致孝恤孤獨以逮不足

上賢以崇德簡不肖以紕惡

紕音出

鄭氏曰司徒地官卿掌邦教者達及也簡差擇也澄
曰此言司徒之所以教即舜之命契者也人之性稟
或殊使民由於禮則過者不得過不及者不得不及
所謂節之也人倫之德民所同德使之能知其教則
莫不感發奮起而興於善所謂興之也為人欲所溺
之謂淫八政有所禁戒如防之隄水所謂防之也道
德一則俗之習尚不各道其所道以為道不各德其
所德以為德所謂同之也耆老所當孝養上之人養
耆老則民皆知致其孝矣孤獨有所不足者上之人
恤孤獨則民皆知逮其不足矣孔氏曰所稟之性恐
其失中故以六禮節之德者得也恐人不德故以七
教興之八政禁令之事以防淫過之失貴賤同故不
云民齊一所以行所得之道德以同國之風俗敬養耆
老所以致敬孝之心哀恤孤獨所以逮及不足逮謂
恩意逮及之不足謂孤獨者也尊上賢人所以崇獎
有德簡去不肖所以絀退惡人方氏曰六禮不修則

壞性非禮節之則流七教不明則隱德非教以興之
則廢政以正民其可差忒乎則在乎齊使之無過行
故曰防淫道人所共由德人所同得其可以二乎則
在乎一使之無異習故曰同俗養耆老則推愛親之
心於是為至恤孤獨則損有餘之心無所不及六十
曰耆七十曰老耆老在所養則耄期可知無父曰孤
無子曰獨孤獨在所恤則鰥寡可知賢者
難於進故上之不肯者惡其雜故簡之

命鄉簡不帥教者以告耆老皆朝于庠元日習射上功
習鄉上齒大司徒帥國之俊士與執事焉不變命國之
右鄉簡不帥教者移之左命國之左鄉簡不帥教者移
之右如初禮不變移之郊如初禮不變移之遂如初禮

不變屏之遠方終身不齒

帥音率朝音潮與音預屏必政切

此言司徒之所教而不成者鄭氏曰帥循也不循教謂教振不孝弟者司徒使鄉簡擇以告者鄉屬司徒耆老皆朝于庠將習禮以化之使之觀焉耆老致仕及鄉中老賢者朝猶會也此庠謂鄉學也鄉謂飲酒也至中年考校而又不變移之左右使轉徙其居覲其見新人有所化也亦復習禮於鄉學使之觀焉鄉則鄉界之外也稍出遠之後中年又為之習禮於鄉學遠郊之外曰遂遂大夫掌之又中年不變復移之使居遂又為習禮於遂之學不變屏之遠方謂九州之外齒猶錄也孔氏曰此論絀惡之事初入學一年之終司徒命此鄉學簡擇不率教者以告司徒司徒乃命鄉內耆老大夫致仕為父師少師者及年老有德行不仕者皆聚會於鄉學之庠為此不率教之人習射禮中者在上故云上功又習鄉飲酒禮令老者

居上故云上齒欲使不率教之人觀其上功自勵為功觀其上齒則知尊長敬老大司徒率領國之英俊士與在射飲執行事焉言國之俊士則非惟鄉內之人也使俊士與之以為榮惡者慕之而自勵又問一年而考校之不變者右鄉移左左鄉移右亦復習射鄉禮故云如初五年之時更不變移之郊又為之習禮亦鄉大夫臨之七年之時又不變移之遂遂大夫亦帥國之俊選於遂學行禮九年之時又不變屏之九州之外澄曰入鄉學第一年之終簡不帥教者告之司徒第二年之正月司徒命鄉大夫為之習射飲禮使之觀感變其傲慢不孝弟之惡教之至第三年之終考校而不變則右鄉移之左左鄉移之右第四年正月鄉大夫又為習射飲禮教之至第五年之終考校而不變則移之郊郊學蓋在鄉遂之間第六年正月鄉大夫又於郊學習射飲禮教之至七年之終考校又不變則移之遂第八年正月遂大夫又於遂

學習射飲禮教之至第九年之終
考校又不變則屏之遠方矣

命鄉論秀士升之司徒曰選士司徒論選士之秀者而升之學曰俊士升於司徒者不征於鄉升於學者不征

於司徒曰造士

選去聲

此言司徒之所教而成者鄭氏曰秀士鄉大夫所考有德行道藝者升之司徒移名於司徒也升之學學大學也不征不給其後役造成也孔氏曰此論崇德之事大司徒之官命卿大夫論量考校此鄉學之人有孝友多才藝秀異之士升於司徒先名惟在鄉今移名於司徒其身猶在鄉學未即貢舉入官也司徒論選士之秀者而升之學則身升於大學非惟升名而已征謂力役供學及司徒細碎之徭役選士雖升

名司徒猶給鄉之徭役俊士身雖升學猶給司徒徭役若其學業既成皆免其徭役者是謂造成之士也方氏曰秀言秀而有所出選言美而可擇俊言敏而可用造言造而有所成升之司徒者曰選士以其猶在所擇也升之學者曰俊士以其皆在所用也秀而為選士則出於一鄉之士秀而為俊士則出於六鄉之士有選士之造者有俊士之造者選士之造不征於鄉俊士之造不征於司徒此其別也征謂行役以從不征所以優賢

樂正崇四術立四教順先王詩書禮樂以造士春秋教以禮樂冬夏教以詩書王太子王子羣后之太子卿大夫元士之適子國之俊選皆造焉凡入學以齒

適多
厯切

此言樂正之所以教即舜之命夔者也雖掌教冑子而司徒所教之造俊亦與鄭氏曰樂正樂官之長掌國子之教虞書曰夔命汝典樂教冑子崇高也高尚其術以作教也順此詩書禮樂四術以教成是士故云以造士春夏陽也詩樂者聲聲亦陽也秋冬陰也書禮者事事亦陰也互言之者皆以其術相成也王子王之庶子羣后公及諸侯皆造焉皆以四術成之也入學皆以長幼受學不用尊卑也孔氏曰此明習業之事樂正之官當先揚導崇此四術以為教謂教暢義理贊明旨趣使學者知之術者道路之名詩書禮樂是也順者依順古先王之道以詩書禮樂之教造成此士四術不可暫闕春教樂兼有禮秋教禮兼有樂夏教詩兼有書冬教書兼有詩皆以其術相成但逐其陰陽以為偏主爾文王世子云將君我而與我齒讓長幼受學雖王太子亦然方氏曰禮者體也於秋教之蓋秋主欸斂所以成體也樂者樂也於春

教之蓋春主發散所以為樂也詩者言也於夏教之
蓋言者事之文夏與物交而成文故也書者事也於
冬教之蓋事為言之實冬與物辨而反實故也然文
王世子言春誦夏絃誦亦詩也絃亦樂也春之教樂
未始無詩夏之教詩非無樂也故絃誦則一詔之以
太師書禮則或詔之以典書或詔之以執禮春夏通
而教之秋冬別而教之者順陽交陰辨之義也自王
太子以至於國之俊選皆造焉者皆從其詩書禮樂
之教也天子之子則適庶皆與諸侯而下則庶子不
與者隆殺之別也選士方升於司徒亦得與在學之
教者教無內外之別也學所以明人倫人倫莫先乎
孝弟故入學者必以齒曰凡則無貴賤皆以齒矣以
大子而與俊選相為齒所
謂行一物而三善皆得也

將出學小胥大胥小樂正簡不帥教者以告于大樂正

大樂正以告于王王命三公九卿大夫元士皆入學不變王親視學不變王三日不舉屏之遠方西方曰棘東

方曰寄終身不齒

棘蒲北切一讀如字

此言樂正之所教而不成者鄭氏曰出學謂九年大成學止也所簡者謂王大子王子羣后之太子卿大夫元士之適子大胥小胥皆樂官屬也大樂正告于王王命皆入學亦謂使習禮以化之不變王入親為之臨視重棄賢者子孫也此習禮皆於大學不舉去食樂重棄人也棘當為焚焚之言偏使之偏寄於夷狄不屏於南北為其大遠延平周氏曰王命三公至於元士皆入學以勸導誘掖之如是而又不變則親視學而又不變是真不能變者也故屏之棘急也示其雖屏之欲棘於悔過寄者示其雖屏之特寓於此

爾屏而必謂之棘與寄者恩也卒不免於不齒者義也方氏曰以視學之禮化之而又不變則終不變矣故三日不舉將以棄之也舉與食日舉以樂之舉同義將棄之而不舉則自貶損以責其教之不至故也棘寄皆以待貴者之禮有別於賤者故然爾賤者至於四不變然後屏之貴者止於二不變遂屏之者陳氏謂先王以衆庶之家為易治以世祿之家為難化易治故鄉遂之所考常在三年大比之時難化故國子之出學常在九年大成之後以三年之近而考焉故必四不變而後屏之以九年之遠而簡焉則雖二不變屏之可也長樂陳氏曰不變者雖王子亦屏遠方其公於教化而不私其子此三代之王所以後世無及也

大樂正論造士之秀者以告于王而升諸司馬曰進士

此言樂正之所教而成者鄭氏曰升於司馬移名於司馬司馬夏官卿主邦政者進士可進受爵祿也孔氏曰此文承王子公卿大夫之子下似專據王子等其實鄉之入學為造士者亦同於此其鄉人不在學者及邦國所貢之士貢於王亦升諸司馬蓋司馬之職以德詔爵以功詔祿即知凡入仕者皆司馬主之下文更不見鄉人及邦國所貢之士故知此中兼之也但鄉人既卑節級升之故為選士俊士至於造士若王子與公卿之子本位既尊不須積漸學業既成即為造士於是大樂正總論此造士以告于王升諸司馬也方氏曰鄉論秀士而升之司徒司徒論選士而升之學所以屬于大樂正也故大樂正又論造士之秀以告于王而升諸司馬焉造士之秀則於成才之中又秀出者也升諸司馬則以將使之臨政故縣於政官之長也以其成才將使臨政則可以進於王所故以進士名之

司馬辨論官材論進士之賢者以告于王而定其論論
定然後官之任官然後爵之位定然後祿之

辨論其論
論定並平

聲又去聲
任音壬

此總言以司徒樂正之所教而成者官之也鄭氏曰
辨其論官其材觀其所長也定其論各署其所長也
官之使之世守也爵之命之也孔氏曰大樂正論造
士之秀者以告于王王必以樂正所論之狀授與司
馬司馬得此所論之狀乃更論辨之觀其材能高下
知其堪任何官是準擬其官以其材故云官材也司
馬辨論之後不堪者屏退論量進士之賢者以告於
王其告王之時正定其論各署其所長若長於禮者
署擬於禮官長於樂者署擬於樂官既論擬定然後
試之以所能之官堪任此官然後爵命之既受爵命

使有職位然後與之以祿也方氏曰司馬辨論官材者將使之臨政則必隨其大小而官之故曰官材定其論則賢否之理各止於一矣前曰造士之秀後曰進士之賢秀特有才之稱賢則有德之稱若司徒司馬之類所謂官若公卿大夫所謂爵若或食九人或食八人所謂祿官所以居之爵所以貴之祿所以富之也官非賤者之可居故既官之必爵之爵之矣宜有以養其庶故既爵之必祿之

○大夫廢其事終身不仕死以士禮葬之

孔氏曰廢其事不堪任大夫也大夫退死葬以士禮致仕而死則以大夫禮葬澄曰此因上文任官而後爵之之言因及不任其官則黜其爵之事大夫老而致仕者生時雖已不居大夫之位然未嘗奪其大夫之爵也故死時仍得葬以大夫之禮若廢其事而終身不復得仕則是大夫之爵已奪不得復名之曰大

夫矣故死之時亦不得復以大
夫禮葬而但以士禮葬之也

○有發則命大司徒教士以車甲

此因上文司徒升造士而司馬官其材因及司馬發
車甲而司徒教其士之事鄭氏曰有發謂有軍師發
卒孔氏曰國有軍旅以發士卒是司馬之事王則命
大司徒教以乘兵車及衣甲之儀容必司徒者以司
徒主衆又主教故與司馬相參也李氏曰司徒教士
則使司馬論其材故出任之為此長鄉大夫伍長軍
將其材無不宜司馬治軍則使司徒教其事故入以
之為此間族黨州鄉伍兩卒旅軍帥其事無不治

○凡執技論力適四方羸股肱決射御凡執技以事上
者祝史射御醫卜及百工凡執技以事上者不貳事不

移官出鄉不與士齒仕於家者出鄉不與士齒

贏力果切

鄭氏曰贏股肱謂探衣出其臂脛使之射御決勝負見勇力也不貳事欲專其事也不與士齒賤也於其鄉中則齒親親也仕於家亦賤故亦不與士齒孔氏曰執技之士凡有三條上條論課試武藝之事言此惟論力以事上故適往四方境界之外則使之探露臂脛角材力決射御勝負以見武勇中條論執技之人有七祝一史二射三御四醫五卜六百工七射御已言此重云者見其色目也下條論執技之人欲使專一其所有之事張子曰贏股肱決射御此執技以有事於外者也若祝史射御醫卜及百工此執技以事君於內者也方氏曰執技者不以德論其力適四方謂有故而之外也贏股肱所以宣手足之力也決射御決勝負於射御也技不止於射御而止以是言者以二技尤論其力也祝史皆事神之官醫醫師之

類卜卜師之類百工土工木工金工石工之類其類
非一故以百言足以興事故謂之工不貳事則欲其
無異習不移官則欲其有常守出鄉不與士齒者以
執技之賤不得與執德者序長幼也然必出鄉而後
不與之齒者以鄉黨尚齒故也長樂陳氏曰於鄉齒
之仁也出鄉不齒義也不於鄉齒之非所以相親不
出鄉不齒非所以相辨士以德技以力德成而上藝
成而下此執技者不與士齒之意也仕於公曰臣仕
於家曰僕公臣與家僕雜居齊齒為非禮此仕於家
者不與士齒之意也仕於家者非技也於此言之者
因其類也

○凡官民材必先論之論辨然後使之任事然後爵之
位定然後祿之

司馬辨論官材既如此矣此言凡官民材則汎論官民材之道也彼言官之此言使之彼言任官此言任事其義一也鄭氏曰論謂考其德行道藝辨謂考問得其定也爵謂正其秩次祿謂與之常食孔氏曰雖考問知其實未明其幹能故任以事事又幹了然後正其秩次除授位定然後與之以祿

爵人於朝與士共之刑人於市與衆棄之是故公家不畜刑人大夫弗養士遇之塗弗與言也屏之四方唯其所之不及以政示弗故生也

鄭氏曰必共之者審慎之也屏猶放去也已施刑則放棄之役賦不與亦不授之以田困乏又無賙餼也孔氏曰既與衆棄之故天子諸侯之家不畜大夫不養士逢之於塗不與言放逐棄去不干及以政教之

事田里所以安其身。賙餼所以養其命。是皆為生之具。今並不與。是不故欲使其生也。方氏曰。爵有德陽之事也。朝在南陽之所也。刑有罪陰之事也。市在北陰之所也。朝者士所立。故言與士共之。市者衆所會。故言與衆棄之。盖有德者人之所共。予有罪者人之所共。棄上言共。下言棄。互相備也。凡此以見人君之所好惡。非出於一人之私。爾畜亦養也。謂之畜。則所養者衆矣。於公家言畜於大夫言養。大小之別也。士不嫌於不能養。特遇之塗。弗與之言而已。使然為故弗。故生者不使之生之謂也。長樂陳氏曰。爵人於朝。周官鄉老及鄉大夫羣吏。獻賢能之書於王。王再拜受之。登于天府。內史貳之。是也。刑人於市。周官鄉士遂士所謂肆之三日是也。書之洛誥與祭統言爵人於廟而不於朝。周官王之同族與有爵者。刑於甸師氏而不於市。盖命之於廟。未嘗不論之於朝。親者在所隱。不可慮之於國人也。澄曰。罪在大辟者。刑之於

市其大辟以下受墨劓剕官之刑而不死者王公大夫之家弗畜養士雖無力畜養偶過之塗亦弗與言以其為衆所同棄之人故也屏之四方則不令居於王畿之內惟其所之則以其身既受刑不復如流宥之罰拘之於一處也役賦之政不及之者不以民伍待之也雖不役賦之亦不贍養之聽其自生自死而已故云示弗故生故謂有意言無意於生之也夫先王之於人類無不欲其生者獨於刑人待之如此非寡恩也義當然也鄭注引虞書五流有宅五宅三居而孔疏謂量罪輕重合所之適處而居之非也彼謂不加五刑而宥之以流遠之罰者爾非謂此已遭刑之人也又引周書者使守門以下而孔疏謂周家畜刑人與夏殷異亦非也彼亦擇其雖受刑而情罪差輕者爾蓋屏之四方者常法也豈人人使之守門關圍積也哉大槩記禮者之言各有其據或有異同當以意通之

右記教士官人凡六節

司寇正刑明辟以聽獄訟必三刺有旨無簡不聽附從

輕赦從重

辟婢亦切
刺七智切

鄭氏曰司寇執官卿掌刑者三刺以求民情一曰訊羣臣二曰訊羣吏三曰訊萬民簡誠也有其意無其誠者不論以為罪附施刑也求出之使從輕雖是罪可重猶赦之也孔氏曰司寇當正定刑書明斷罪法使刑不差二法不傾邪以聽天下獄訟必三刺者言刑法宜謹不可專制刺赦也謂欲赦犯罪之人其一問可赦與否於羣臣謂公卿大夫士其二問可赦與否於羣吏謂庶人在官者其三問可赦與否於庶人謂萬姓衆來觀者此三刺雖以赦為本其被刑不赦者亦當問之有旨無簡不聽者旨意也求民情既得

其所犯之罪雖有旨意無誠實之狀則不聽之不論
以為罪也附從輕者施刑之時此人所犯之罪在輕
重之間可輕可重則當求可輕之刑而附之罪疑惟
輕是也赦從重者所犯之罪本非故為而入重罪放
赦之時從重罪之上而赦之其意輕故也尚書書災
肆赦是也方氏曰簡所以書獄辭與書所謂五刑不
簡之簡同山陰陸氏曰聽訟若無
簡書可書之實狀可據則不聽也

○凡制五刑必即天論郵罰麗於事

論如字
一音倫

鄭氏曰制斷也即就也必即天論言與天意合即或
為則論或為倫郵過也麗附也過人罰人當各附於
其事不可假它以喜怒孔氏曰制是裁制非言初制
五刑也論謂論議制五刑之時必就上天之意論議
輕重天意好生又有時以生有時以殺論刑亦當好
生使生殺得中論或為倫倫理也就天之倫是生殺

得中之理郵謂斷人罪過罰謂責罰其身皆依附於所犯之事不可離其本事假別事而為喜怒也長樂陳氏曰郵呂刑所謂五過也罰呂刑所謂五罰也方氏曰五刑不簡然後正乎五罰五罰不服然後正乎五過罰輕於刑過又輕於罰此以郵罰言者輕且如此其重可知矣言以郵罰為序亦先輕也

○凡聽五刑之訟必原父子之親立君臣之義以權之

意論輕重之序慎測淺深之量以別之悉其聰明致其

忠愛以盡之疑獄汎與衆共之衆疑赦之必察小大之

比以成之

別彼列切汎孚劒切
比必利切方如字

鄭氏曰權平也意思念也淺深謂俱有罪本心有善惡也盡之盡其情也小大猶輕重也已行故事曰比

長樂陳氏曰原父子之親則以恩掩義立君臣之義則以義掩恩悉其聰明則得其情致其忠愛則哀矜而勿喜獄疑與衆共之呂刑所謂胥占是也衆疑赦之呂刑所謂刑罰之疑有赦是也輕重言其罪淺深言其情大小言其辟方氏曰父子之親本乎情故曰原君臣之義錯諸事故曰立親主於愛一於愛則刑有所不忍加義主於敬一於敬則刑有所不敢及一皆如是豈足以為法之經哉其或於親有所原於義有所立者特從法之權而已故曰以權之也事之輕重各有序也而不可亂焉行其事者其可以無論乎情之淺深各有量也而不可過焉原其情者其可以無測乎事非有感無所用論故曰意論以意生乎有感故也情非用誠不可以測故曰慎測以慎由乎用誠故也若是則輕重淺深各得其辨矣故曰以別之也悉其聰則所聰無遺悉其明則所見無遺致其忠則不欺之至致其愛則不忍之至若是則有不盡於

刑之道乎故曰以盡之也汎與汎愛之汎同可信則
斷之以已可疑則資之於衆衆疑赦之者又不以偏
愛而有所釋必察其罪之在大辟則比於大辟以成
其獄察其罪之在小辟則比於小辟以成其獄比之
為言附也呂刑所謂上下比罪是矣其序則首言以
權之者見先王之用刑非以為常也然事情不可以
無辨故繼言以別之別之則理無遺矣故繼言以
盡之盡之則獄可以決矣故曰以成之而終焉

成獄辭史以獄成告於正正聽之正以獄成告于大司
寇大司寇聽之棘木之下大司寇以獄之成告於王王
命三公參聽之三公以獄之成告於王王三又然後制
刑

鄭氏曰史司寇吏也正於周鄉師之屬今漢有正平丞泰所置周禮鄉師之屬辨其獄訟異其死刑之罪而要之職聽於朝司寇聽之朝王之外朝也左九棘孤卿大夫位焉右九棘公侯伯子男位焉面三槐三公位焉大司寇聽之棘木之下即此外朝也獄成告于王王使三公復與司寇及正共平之重刑也周禮王欲免之乃命公會其期三宥曰遺忘孔氏曰成獄辭宥曰不識再宥曰過失三宥曰遺忘孔氏曰成獄辭者獄史初責數罪人之辭已成定也史以成辭告于正正得史告罪成之辭而又聽察也正聽已竟又以獄成之辭告於大司寇大司寇與公卿在朝槐棘之下聽獄訟成以告於王也王既得司寇之告成辭而下聽獄訟不可謬妄故又命三公與司寇及正更共相參而聽之也三公參聽得其情實以獄成辭告於王王得三公之告則以三事命寬宥之一宥不識者不審也若仇讎當報甲見乙誠以為甲而殺之二宥過失

者若舉刀欲斫伐而軼中人三宥遺忘者若問惟薄
忘有在焉而以兵矢投射之王恐有此三事致罪故
令宥之若不當三事造罪者然後制刑鄭注鄉師之
屬鄉謂鄉士師謂士師屬謂遂士縣士方士等非地
官之鄉師也漢書百官表廷尉秦官掌刑辟有正
左右監宣帝初置左右平鄭見古有正連言平耳

○凡作刑罰輕無赦刑者例也例者成也一成而不可

變故君子盡心焉

例音刑

鄭氏曰法雖輕不赦之為人易犯也變更也孔氏曰
此文起例故云凡作刑罰也此非疑獄故雖輕不赦
若輕者輒赦則犯者衆也刑者例也上刑是刑罰之
刑下例是例體之例言刑罰之刑如人例體例者成
也言例體之例是人之成就容貌容貌一成之後若
以刀鋸鑿之斷者不可續死者不可生故云不可變

君子盡心以聽刑悉其聰明致其忠愛是也

析言破律亂名改作執左道以亂政殺作淫聲異服奇技奇器以疑衆殺行偽而堅言偽而辨學非而博順非而澤以疑衆殺假於鬼神時日卜筮以疑衆殺此四誅者不以聽

行去聲

鄭氏曰析言破律巧賣法令者也亂名改作謂變易官與物之名更造法度也左道若巫蠱及俗禁淫聲鄭衛之屬也異服若鵠冠瓊弁也奇技奇器若公輸般請以機寔行偽至而澤皆謂虛華捷給無成者也假於鬼神時日卜筮今時持喪葬築蓋嫁取卜筮文書使民倍禮遺制者四誅不以聽為其為害大而難

不可明孔氏曰左道謂邪道道尊右右為貴故正道為右不正道為左巫蠱蠱者損壞之名巫行邪術損害人若武帝時江充埋桐人於太子宮是也俗禁若前漢張竦行辟反支後漢郭躬傳有陳伯子者出辟往亡入辟歸忌是也鄭衛多淫風故為淫聲桑間濮上之音亦是鄭子臧好鵠冠楚子玉為瓊弁玉纓皆異服也公輸般請以機寔指其人巧謂之奇技指其機寔謂之奇器故奇技奇器總謂般也行此詐偽而守之堅固不肯變改言談偽事而辭理明辨不可屈止習學非違之書而又廣博順從非違之事而能光澤文飾假於鬼神時日卜筮者執持邪術妄說禍福妖祥吉凶恐懼人以求財利者鄭注繁蓋謂築垣墻蓋舍宇方氏曰折言破律則離於理而壞於法亂名改作則失其實而反其常左道者於道逆而不便若是者皆亂政馬氏曰淫聲惑民聽異服惑民視奇技奇器惑民心偽對誠之辭非對是之辭言偽行偽

而不由於誠學非順非而不由於是甚至堅辨博澤
有以惑衆長樂陳氏曰折言破律亂名改作執左道
者多出於在上者之所為故亂政所謂發於其政害
於其事者也淫聲以至時日卜筮多出於在下者之
所為故疑衆所謂發於其事害於其政者也亂政者
其害大疑衆者其害小此亂政之誅所以先於疑衆
也澄曰先王盛時教明俗美何至有如是四等之人
世衰道微容或有焉有王者作亦禁之而已矣禁之
不可屏之四方而已矣何遽至於殺之哉此殆末流
曲士憤世疾邪而不自知其言之過其言與作儒行
之人識趣習氣
畧同讀者詳之

○凡執禁以齊衆不赦過

鄭氏曰亦為人將易犯

有圭璧金璋不

粥於市命服命車不粥於市宗廟之器不粥於市犧牲

不粥於市戎器不粥於市用器不中度不粥於市兵車
不中度不粥於市布帛精麤不中數幅廣狹不中量不
粥於市姦色亂正色不粥於市錦文珠玉成器不粥於
市衣服飲食不粥於市五穀不時果實未孰不粥於市
木不中伐不粥於市禽獸魚鼈不中殺不粥於市

粥音育中

去聲

方氏曰金璋蓋以金飾之璋即考工記所謂大璋中
璋黃金勺青金外者是也言圭璧金璋則琉璃之類
可知命服謂君所命之服若再命受衣服者是矣命
車謂君所命之車若三命受車馬者是矣戎器不粥

而兵車之中度則得粥之者以邱乘出車賦而兵車之粥不可禁故也姦色謂若紅紫之類正色謂若玄黃之類孔子惡紫之奪朱則姦色固能亂正色以其不正足以生姦也錦文猶月令之言文繡言錦則繡可知言文則章可知珠玉未成器而得粥於市者以用之為器然後見其為奢也衣服飲食人之所日用者不可不粥此亦禁其侈靡者而已鄭氏曰戎器軍器也粥賣也圭璧金璋至戎器皆尊物非民所宜有也用器不中度至姦色凡以其不可用也用器弓矢耒耜飲食器也度丈尺也敦升縷多少錦文珠玉成器衣服飲食不粥於市不示民以奢與貪也成猶善也五穀果實未成不利人未伐之非時禽獸魚鼈菽之非時皆不中用故皆不粥於市周禮仲冬斬陽木仲夏斬陰木春獻鼈鼈歷月令季冬始漁孔氏曰圭璧金璋及犧牲戎器皆是尊貴所合蓄之物非民所宜有防民之僭偽賊亂也飲食器者既夕禮敦杆之屬

布帛精麤者若朝服之布十五升斬衰三升齊衰四升之類是也廣狹者布廣二尺二寸帛廣二尺四寸若不中度數並不粥於市衣服飲食與珠玉連文據華美者不得粥之若常飲食則得粥但不得羣聚而周禮司飭禁屬游飲食于市是也前言圭璧金璋是貴者之器非民所宜有此錦文珠玉是華麗之物富人則有但不得聚之過多故云不粥於市不示民以奢也飲食不粥者不示民以貪也

關執禁以譏禁異服識異言

鄭氏曰關竟上門譏訶察孔氏曰司關之官執此戒禁之書以譏察出入之人禁身著異服者又識口為異言之人防其偽察非違

右記制刑明禁凡五節

大史典禮執簡記奉諱惡

惡鳥路切

鄭氏曰簡記策書也諱先王名惡忌日若子卯孔氏曰大史之官典掌禮事國之得失是其所掌執此簡記策書以所諱所惡之事奉進於王諱先王名惡子卯日其餘諱惡之事亦大史奉之方氏曰執簡記周官大史執書抱法是也奉諱惡小史詔王之忌諱是也此一言之於大史者以小史為大史之佐故得以兼之簡記謂簡冊所記之言也執謂執之於此奉謂奉之於上凡此特用於行禮之時爾故以典禮言之

○天子齊戒受諫司會以歲之成質於天子冢宰齊戒受質大樂正大司寇市三官以其成從質於天子大司徒大司馬大司空齊戒受質百官各以其成質於三官

大司徒大司馬大司空以百官之成質於天子百官齊

戒受質然後休老勞農成歲事制國用

齊側皆切下同會古外切勞去

聲

鄭氏曰歲終羣臣奏歲事諫王所當改爲也司會冢宰之屬掌計要者成計要也質猶平也平其計要冢宰齊戒受質贊王受之大樂正於周宗伯之屬司市也於周司徒之屬從從於司會也百官司徒司馬司空三官之屬也百官受質受平報也休老勞農饗養之也成歲事斷計要也孔氏曰以其歲終天子舊來所施之事或有不便須有改爲百官以此上諫於王天子以其事重故先齊戒而後受其諫也司會總主羣官治要故以一歲治要之成質於天子質平也謂奏上文簿聽天子平量之也冢宰貳王治事故

亦齊戒贊王受羣官所平之事謂共王論定也大樂
正大司寇市三官各以其當司成要隨從司會平於
天子以周法言之司會總主羣官簿書則司徒司馬
司空簿書亦司會掌之質於天子所以下文司徒司
馬司空各質於天子不由司會唯大樂正大司寇市
三官從司會質於天子者司會總主治要先質於王
若今時先中帳目樂正司寇司市當司事少即經從
司會以質於王其司徒司馬司空總主萬民其事既
大雖司會進其治要仍須各受質屬官親自質於天
子百官齊戒受質者以司徒司馬司空質於天子天
子平斷畢當須報於下百官齊戒受天子所平之要
然後休老勞農即十月蜡祭飲酒勞農也斷定計要
一歲事成乃制來歲之
國用故云制國用也

○冢宰制國用必於歲之杪五穀皆入然後制國用

地小大視年之豐耗以三十年之通制國用量入以為

出

抄芒小切
量音亮

鄭氏曰制國用如今度支經用抄末也小大豐耗謂小國大國豐凶之年各以歲之收入制其用多少多不過禮少有所殺也通三十年之率當有九年之蓄出謂所當給為應氏曰必於歲之抄者天時既周而來歲之事方始也五穀之熟有先後皆入則高下無遺而豐歉盡見矣馬氏曰財之所出在於地地之所生本於天蓋禮之大倫以地廣狹者常也禮之厚薄與年上下者變也制國用者非特量今歲之入以為來歲之出以三十年通融計之然後可孔氏曰制國之用必計地小大又視年之豐耗若地大年豐則制用多地少年耗則制用少先以三十年通融之法留九年蓄外計見在之物以制國用每年所入分為四

分一分擬為儲積三分為當年所用二年又留一分
三年又留一分是三年總得三分為一年之蓄通三
十年之率當有
十年之蓄也

祭用數之仿喪用三年之仿喪祭用不足曰暴有餘曰

浩祭豐年不奢凶年不儉

仿音勒
一音力

鄭氏曰祭則筭今年一歲經用之數用其什一喪大
事故用三歲之什一暴猶耗也浩猶饒也不奢不儉
常用數之仿也孔氏曰仿是分散之名考工記云以
其圓之仿指其數彼仿謂三分之一此仿為什一者
以民稅一歲之什一則國祭所用亦什一此謂當年
經用之內用其什一非是通計擬三年儲積之蓄也
方氏曰祭之用數而寡故用一年之仿喪之用疏而
多故用三年之仿澄曰暴如日之暴曬乾暎削小宜

加之以滋潤浩如水之浩渺泛溢過多宜約之以限節祭禮有定制用財有常數不以年之豐凶而隆殺也

國無九年之蓄曰不足無六年之蓄曰急無三年之蓄曰國非其國也三年耕必有一年之食九年耕必有三年之食以三十年之通雖有凶旱水溢民無菜色然後天子食日舉以樂

延平周氏曰不足言其財急言其民國非其國言其君馬氏曰國之所以為國以有民也民之所以為民以有財也苟無其財則民散而之四方矣故國非其國也三年耕必有一年之食推而至於二十七年耕

必有九年之食以三十年言之者舉成數也有九年之食者人力也凶旱水溢者天變也人力備則雖有天變而民無菜色然後天子食日舉庶羞備禮而以樂侑之也孔氏曰凶旱謂凶荒遭旱水溢謂水之泛溢鄭氏曰菜色食菜之色民無食菜之飢色天子乃日舉樂以食應氏曰非謂旱乾水溢亦不廢樂也謂既有三十年通制之備雖凶災而民不病則常時可以日奉樂爾若夫偶值凶年則雖有備而亦豈敢用乎樂

右記質成制用凡三節

有虞氏養國老於上庠養庶老於下庠夏后氏養國老於東序養庶老於西序殷人養國老於右學養庶老於

左學周人養國老於東膠養庶老於虞庠虞庠在國之西郊

延平周氏曰有虞言氏而不言后夏言后而言氏至殷周而皆言人張子曰有虞氏言氏者止以其身而得天下自庶人時已稱虞舜元不曾有封夏后氏言后者謂以君而得天下夏后氏猶言夏君氏稱君者以國興禹崇伯之子也殷人周人言人者謂以衆而得天下殷周以衆興言以其衆興起於彼方也以君者止以其君之身以衆者謂以其國之衆各以其所以得天下名之鄭氏曰上庠右學大學也在西郊下庠左學小學也在國中王宮之東東序東膠亦大學在國中王宮之東西序虞庠亦小學也西序在西郊周立小學於西郊周之小學為有虞氏之庠制是以名庠云其立鄉學亦如之或上西或上東或貴在國

或貴在郊異者四代相變爾孔氏曰熊氏云國老謂卿大夫致仕者庶老謂士也皇氏云庶老兼庶人在官者其致仕之老大夫以上當養從國老之法士養從庶老之法虞殷尚質貴取物成故大學在西小學在東夏周貴文取積漸長養故大學在東小學在西長樂陳氏曰四代之學虞則上庠下庠夏則東序西序殷則右學左學周則東膠虞庠而周又有辟雍成均瞽宗之名上庠東序右學東膠大學也故國老於此養焉下庠西序左學虞庠小學也故庶老於此養焉周之辟雍即成均也東膠即東序也瞽宗即右學也以樂祖在焉則曰瞽宗以居右學則曰右學蓋周之學成均居中其左東序其右瞽宗此大學也虞庠在國之西郊則小學也記曰天子視學命有司行事祭先師先聖焉卒事遂適東序設三老五更之席又曰食三老五更於大學所以教諸侯之弟祀先賢於西學所以教諸侯之德夫天子視學則成均也命有

司行事祭先師先聖焉即祀先賢於西學也祀先賢於西學則祭瞽宗也有司卒事適東序設三老五更之席即養國老於東膠也養國老於東膠即食三老五更於大學也然則殷之右學在周謂之西學亦謂之瞽宗夏之東序在周謂之東膠亦謂之大學蓋夏學上東而下西旋學上右而下左周之所存特其上者爾則右學東序蓋與成均並建於一邱之上也由是觀之成均頌學政右學祀樂祖東序養老更右學東序不特存其制而已又因其所上之方而位之也朱子曰諸儒皆以養國老者為大學養庶老者為小學蓋亦因正制之言而意之爾陳氏說其位置又與鄭氏諸儒之說不同皆無所考闕之可也

○有虞氏皇而祭深衣而養老夏后氏收而祭燕衣而養老殷人皐而祭縞衣而養老周人冕而祭玄衣而養

老

呼向
甫切

鄭氏曰皇冕屬畫羽飾焉凡冕服皆玄上纁下凡養老之服皆其時與犀臣燕之服有虞氏質深衣而已夏而改之尚黑而黑衣裳殷尚白而縞衣裳周則兼用之玄衣素裳其冠則弁追章甫委貌也孔氏曰皇鳳凰字鳳羽五采故畫羽飾之周禮有設皇邸又有皇舞馬氏曰祭所以追養繼孝而年之貴乎天下久矣次乎事親也故先言祭而次言養老皇與牧呼與冕首所加之冠也深衣燕衣縞衣玄衣身所衣之服也祭則言冠而不言衣養老則言衣而不言冠方氏曰祭非無衣也然主冠言之者蓋冠在首有尊尊之義焉而祭所以推尊尊之義故也養老非無冠也然主衣言之者蓋衣在體有親親之仁焉而養老所以明親親之仁故也

○凡養老有虞氏以燕禮夏后氏以饗禮殷人以食禮

周人脩而兼用之

食音嗣

鄭氏曰凡飲養陽氣凡食養陰氣陽用春夏陰用秋冬兼用之備陰陽也孔氏曰凡養老者皇氏云人君養老有四種一是養三老五更二是子孫為國難而死王養死者父祖三是養致仕之老四是引戶校年養庶人之老熊氏云天子視學之年養老一歲有七謂四時皆養老凡四也又文王世子云凡大合樂必遂養老注云大合樂謂春入學舍蒙合舞秋頒學合聲通前為六又季春大合樂天子視學亦養老世子云凡視學必遂養老是總為七也有虞氏以燕禮者虞氏云燕禮脫屣升堂崔氏云燕者敬燕於俎行一獻之禮坐而飲酒以至於醉有虞氏帝道弘大故養老以燕禮夏后氏以饗禮者崔氏云饗則體薦而不

食爵盈而不飲依尊卑為獻取數畢而已夏貴禮故養老以饗禮殷人以食禮者崔氏云不飲酒享大牢以禮食之殷人質素故養老以食禮周人脩而兼用之者謂周人脩三代之禮春夏養老之時用虞氏燕禮夏后氏饗禮秋冬養老之時用殷人食禮周桓文故兼用之也皇氏云饗有四種一是諸侯來朝天子饗之則周禮大行人職云上公之禮其饗禮九獻是也其牲則體薦體薦則房烝故春秋宣十六年左傳云饗有體薦又國語云王公立飲則有房烝其所云飲即謂饗也立而成禮則謂之飲其禮亦有飯食故春人云凡饗食共其食未鄭云饗有食未則饗禮兼燕與食也二是王親戚及諸侯之臣來聘王饗之禮亦有飯食及酒其酌數亦當依命執其牲則折俎亦曰敬烝也故國語云親戚宴饗則有饋烝謂以燕禮而饗則有之也左傳云饗有體薦宴有折俎公當饗卿當宴王室之禮也時定王饗士會而用折俎以

國語左傳觀之則知王親戚及諸侯之大夫來聘皆折俎饗也其饗朝廷之臣亦當然也三是戎狄之使來王饗之其禮則委饗也王不親饗但以牲全體委與之故國語云戎狄貪而不讓坐諸門外而體委之是也若夷狄君來則當與中國子男同故小行人職掌大賓小客所陳牲牢當不異也四是饗宿衛及耆老孤子則以醉為度故酒正云凡饗士庶子饗耆老孤子皆共其酒無酌數鄭云要以醉為度食禮者有飯有餼雖設酒而不飲其禮以飯為主故曰食也其禮亦有二種一是禮食故大行人云諸公三食之禮有九舉及公食大夫禮之屬是也二是燕食謂臣下自與賓客旦夕共食按鄭注曲禮酒漿處右云此大夫士與賓客燕食之禮也燕禮者凡正饗食在廟燕則在寢燕以示慈惠故也燕禮則折俎有酒而無飯其牲用狗燕安也其禮最輕升堂行一獻禮畢而脫屣升堂坐飲以至醉也儀禮猶有諸侯燕禮一篇凡

燕禮亦有二種一是燕同姓二是燕異姓故鄭箋湛露詩云夜飲之禮同姓則成之庶姓諫之則止此燕饗食致仕之老則當用正饗正食正燕之禮以其有賢德不可以褻禮待之其饗死事之老不必有德又是老人不宜久立當用折俎之饗燕食之食異姓之燕禮也皇氏云春夏雖以飲為主亦有食先行饗次燕次食秋冬雖以食為主亦有饗先行食次燕次饗一日之中三事行畢義或然也長樂陳氏曰天子之於老也其所養也三國老也庶老也死政者之老也庶養之也三仲春也季春也仲秋也周禮羅氏羅春鳥獸鳩以養國老在仲春月令養衰老授几杖在仲秋文王世子曰凡大合樂必遽養老鄭氏云大合樂謂春入學舍菜合舞秋頒學合聲於是時也天子則視學遂養老此養老於仲春仲秋者也月令季春之末擇吉日大合樂天子親往視之亦必養老此又養老於季春者也若夫簡不帥教出征受成以訊讖告

凡天子入學莫不養老此又不在歲養之數也又有
死政者之老焉故羅氏獻鳩以養之者國老也司徒
以保息養之者庶老也司門以其財養之者死政者
之老也若夫外饗酒正攝人所謂耆老者總三者而
言之也先王父事三老兄事五更則三老五更乃羣
老之尤者而致仕之老者固在其間皇氏離而三之
誤矣月令無冬夏養老之文周禮禮記特言春養秋
食而已熊氏謂養老歲有七亦誤矣行葦言飲射而
繼之以祈黃耆此周人以燕禮養老也周官外饗言
饗耆老此周人以饗禮養老也祭義曰食三老五更
於大學天子袒而割牲執醬而饋執爵而醕此周人
以食禮養老也清江劉氏曰以養莫善於燕莫不善
於饗而食次之以養義莫善於饗莫不善於食而燕
次之周人備矣所謂養老者養其體者也故擇其柔
嘉選其馨香潔其酒醴品其豆邊脩其簋盛奉其犧
象謹其祓除於是乎體解節折而共飲食之又為折

俎加豆是以惠豐而德洽民之見者以為盡心也莫不加愛焉故莫善於燕夫饗所以訓恭儉也而養老所以充體氣也脩其物篤其意而不得躬之酒盈而不飲肉乾而不食設几而不倚一獻而百拜惡在其患也故莫不善於饗是有虞氏所以不從也所謂養義者養其賢者也年者天下之達尊也爵者天下之達尊也以達尊之爵養達尊之年其意猶不敢褻為之故一獻而百拜民之見者以為至恭也莫不如肅焉故莫善於饗夫養義者貴其養志也若曾子之養曾皙者也而食者無百拜之恭無一獻之節此所謂養口體也若曾元之養曾子者也民之見者可易也故曰莫不善於食是夏后氏所以不從也三聖之作非以相反也養老以彼養義以此所以尊其年尚其德也尊其年仁也尚其德義也周人通其道達其意脩而兼用之仁且義是謂大備矣

五十養於鄉六十養於國七十養於學達於諸侯八十
拜君命一坐再至瞽亦如之九十使人受

鄭氏曰國國中小學在王宮之左學大學也在郊小
學在國中大學在郊此殷制達於諸侯天子諸侯養
老同也命謂君不親饗食必以其禮致之孔氏曰此
謂子孫為國死難而王養其父祖也五十始衰故養
於鄉學六十漸衰養禮彌厚故養於國中之小學七
十大衰養禮轉重故養於大學此養老之事非惟天
子之法乃通達於諸侯也至於年八十衰弱不堪未
學受養君以饗食之禮使人就家致之其受君命之
時理須再拜不堪為勞一坐於地而首再至於地也
瞽人無目恐其傾倒拜君命亦當如此方氏曰九十
筋力尤衰又不必親拜特使人代受其命可也清江
劉氏曰養於鄉者鄉飲酒之禮五十者始預於養也六

十養於國者有命調餼老者則及之矣養於學者則君就行焉

五十異糧六十宿肉七十貳膳八十常珍九十飲食不

離寢膳飲從於遊可也

糧陟良切
離去聲

鄭氏曰糧糧也貳副也遊謂出入止觀孔氏曰自此以下雜記卿大夫士及庶人年老節制在家自養之法隨年為品也五十始衰糧宜自異不可與少壯者同也六十轉老故恒宿肉在帳下不使求而不得也膳善食也七十恒令善食有儲副不使有闕也八十常使有珍奇養食九十飲食無時或急求須得故不離於寢美善之膳水漿之飲從於所遊之處可也

六十歲制七十時制八十月制九十日脩唯絞紛衾冒

死而后制

絞戶交切
紼其鳩切

年既哀老預為送終之具歲制謂棺也不易可成故歲制然此謂大夫以下爾人君即位為梓不待六十也其槨則死後為之時制謂一時可辦是衣物之難得者七十年轉老所須辦轉切月制謂一月可辦衣物易得者九十棺衣皆畢但日日脩理之為近於終故也紼紼衾冒四物易成故生不逆為須亡乃制也故檀弓曰一日二日而可為也者君子弗為也馬氏曰五十異振而下養生之禮也六十歲制而下送死之禮也

五十始衰六十非肉不飽七十非帛不煖八十非人不煖九十雖得人不煖矣

鄭氏曰煖溫也方氏曰三十曰壯四十曰強壯強則盛極矣盛之極則趨於衰而已故五十為始衰之年自此以往宜有以扶其衰九十雖得人不煖則以衰之極養之宜無所不至故也延平周氏曰孟子言五十可衣帛七十可食肉與此不同王制言養血氣以食為先衣為次孟子言王政之序足衣而後足食澄曰王制汎言人之氣體六十必待食肉乃飽徒食則不可也七十者必待衣帛乃溫但衣布則不可也孟子言王政制民產之事農夫之家能樹桑則五十之年雖不衣帛亦煖者已可以衣帛矣六十之年雖宜食肉然雞豚之畜或恐贍養不及故約其制云七十者可以食肉若其贍足則六十者固亦食肉也

五十杖於家六十杖於鄉七十杖於國八十杖於朝九

十者天子欲有問焉則就其室以珍從

從才用切
又如字

長樂陳氏曰大夫七十而後賜之杖五十而杖者蓋杖於家鄉國者不待賜杖於朝則非賜不可也九十就其室所以尊之以珍從所以養之也方氏曰杖者所以扶其力而優其禮也杖於家則不得杖於鄉杖於鄉則不得杖於國杖於國則不得杖於朝杖於朝則無適而不杖矣至於九十自不能至於朝天子欲有問焉則就其室巡守之禮問百年者就見之而此言九十者彼所言一國之老不必有爵故其禮殺此所言天下之老唯有爵者而已故其禮備而又以珍從也祭義言八十君問則就之者彼言異禮此言常禮

七十不俟朝八十月告存九十日有秩

鄭氏曰大夫士之老者君揖則退故不俟朝月告存每月致膳也秩常也日有常膳孔氏曰此謂大夫士

老年而聽致事者朝君之時入門至朝位君出揖之即退不待朝事畢也告謂問也八十者君每月使人致膳告問存否九十極老君則日使人以常膳致之方氏曰日有秩日有常賜也酒正之秩膳是矣

五十不從力政六十不與服戎七十不與賓客之事八

十齊喪之事弗及也

與音預

鄭氏曰五十力捐衰也力政城道之役與及也八十不齊則不祭也子代之祭是謂宗子不孤孔氏曰上文歲制及杖於家之屬兼大夫士及庶人之老此五十不從力政則惟據庶人力政謂築城治道其大夫士六十未致仕若為軍將當與服戎謂庶人從軍為士卒按易孟氏韓氏說年二十行役三十受兵六十還兵古周禮說國中自七尺以及六十野自六尺以及六十有五皆征之許慎云漢承百王而制二十三

而役五十六而免六十五已老而周復征之非用民意鄭駁之云周禮皆征之者使為胥徒給公家之事如今之正衛爾胥徒事暇坐息之間多如鄭此說力政田役為重故五十免之此云五十不從力政祭義云五十不為甸徒是也戎事差輕故六十不與服戎如孟氏說六十還兵是也胥徒又輕故野外六十五猶征之若四郊之內以其多役故二十受役六十乃免野外則力役少故十五征之六十五乃免若兵革之事則三十受兵如孟氏韓氏說馬氏曰力政服戎此免於公者也賓客齊喪此免於私者也蓋代之以子孫矣

五十而爵六十不親學七十致政唯衰麻為喪

鄭氏曰爵謂賢者命為大夫不親學不能備弟子禮致政還君事也方氏曰五十曰艾服官政故受爵受

爵則服官政也六十曰耆指使故不親學學所以事人非所以使人也七十曰老而傳故致政外則致其政於君內則傳其事於子孫也惟哀麻為喪與曲禮惟哀麻在身同義然此齊哀之事猶及也所以異於八十者歟山陰陸氏曰子游為之麻哀壯麻經彼言麻哀此言哀麻哀麻先哀以輕服服重也言雖重服惟服麻哀而已此雖謂之哀麻無壯麻經矣

○凡三王養老皆引年八十者一子不從政九十者其家不從政廢疾非人不養者一人不從政父母之喪三年不從政齊衰大功之喪三月不從政將徙於諸侯三月不從政自諸侯來徙家期不從政

不養如字又去聲期音暮

鄭氏曰已而引戶校年當行復除也老人衆多非賢者不可皆養廢廢於人事長樂陳氏曰凡言養老必兼虞氏此特言三王引年者遠畧近詳故也有其德而非其年則未可以養有其年而非其德則不可以養特言引年者養老以年為主也老者病者在所養喪者在所恤徙者在所寬此所以或復其家或復其子或復其身也孔氏曰將徙於諸侯謂大夫采地之民徙於諸侯為民以其新徙常須復除但諸侯地寬役少為人所欲故惟三月不從政自諸侯來徙於家者謂諸侯之民來徙於大夫之邑以大夫地狹役多欲令人貪之故期不從政按旅師云新甿之治皆聽之使無征役

少而無父者謂之孤老而無子者謂之獨老而無妻者謂之矜老而無夫者謂之寡此四者天民之窮而無告

者也皆有常餽

山去聲
與鰥同

鄭氏曰餽廩也方氏曰若此之人雖欲有所赴愬而求通莫之得矣故曰天民之窮而無告者文王發政施仁必先斯四者其以是與中山成氏曰有室無父不為孤壯而無子不為獨四十無妻不為鰥三十無夫不為寡聖人深意先王制禮憂民之極則以老少年齒為限也

瘠聾跛躄斷者侏儒百工各以其器食之

瘠於今切
跛彼我切
躄必

亦切食

音嗣

鄭氏曰侏儒短人也器能也孔氏曰瘠謂口不能言聲謂耳不聞聲跛躄謂足不能行斷者謂支節解絕侏儒謂容貌短小此等既非老無告不可與常餽然有疾病又不可不養故同於百工雜技藝之人各因

其器能供官役使以廩餼食之按晉語文公問八疾
胥臣對云戚施植鑄謂使擊鍾也蘧蒢蒙璆謂使擊
玉磬也侏儒扶廬謂使持戟柄也矇瞍循聲謂使歌
詠琴瑟也聾瞶司火謂使主然火也其童昏瞶瘖僂
僂官師所不材宜於掌土是各以器食之外傳不云
跛躄此不云蘧蒢戚施設文不具外傳瘖與僂置
於掌土此瘖與侏儒以器食之者今古法異也方氏
曰百工凡執一藝者是也先王之時瘖者以之掌土
聾者以之司火則者以之守圉則跛躄斷者之類
也侏儒以之扶廬以至陶者之治埴匠者之治木冶
氏之攻金玉人之攻玉所謂各以其器食之也先王
之政如是所以使在下者無廢才在上者無虛用而
人人各得其養也器者隨其小大長短
而用之孔子所謂使人也器之是矣

○道路男子由右婦人由左車從中央

鄭氏曰道有三塗遠別也長樂陳氏曰男女嫌於無別故男右女左車患於陷危故從中央設弧悅男門左女門右拜男尚左女尚右鬢亦男左女右祭則君在阼夫人在房此陰陽之禮也道路則男右女左者地道尊右故也

父之齒隨行兄之齒鴈行朋友不相踰

鄭氏曰謂於塗中澄曰父之齒謂年與父相若者隨行隨從其後而行當其背而正對也兄之齒謂年與兄相若者鴈行如鴈飛之次而行在其側而斜退也朋友謂年與己相若者不相踰曲禮所謂肩隨謂兩肩相並少者微後不踰過其前也

輕任并重任分班白者不提挈

并必性切

鄭氏曰并分皆謂以與少者雜色曰班孔氏曰任謂擔負俱有擔負老少並輕則并與少者擔之老少並重不可并與少者一人則分為輕重重與少者輕與老者澄曰髮半白半黑之人少者為代其勞不令自提挈也孟子言班白者不負戴於道路意同

君子耆老不徒行庶人耆老不徒食

鄭氏曰徒猶空也山陰陸氏曰無車而行為徒行無肉而食為徒食

右記養老恤窮凡六節

天子五年一巡守

守去聲下同

鄭氏曰天子以海內為家時一巡省之五年者虞制也周則十二歲一巡守孔氏曰堯典云五載一巡守

白虎通云三歲一閏天道小備五歲再閏天道大備故五年一巡守夏與殷六年一巡守取半一歲之律呂周官大行人云十有二歲王巡守殷國象歲星周也

歲二月東巡守至于岱宗柴而望祀山川覲諸侯問百年者就見之命大師陳詩以觀民風命市納賈以觀民之所好惡志淫好辟命典禮考時月定日同律禮樂制度衣服正之山川神祇有不舉者為不敬不敬者君削以地宗廟有不順者為不孝不孝者君絀以爵變禮易樂者為不從不從者君流革制度衣服者為畔畔者君

討有功德於民者加地進律

賈音嫁好惡並去聲辟匹亦切

鄭氏曰柴祭天告至也覲見也陳詩謂采其詩而視之市典市者賈謂物貴賤厚薄也質則用物貴淫則侈物貴民之志淫邪則所好者不正也舉猶祭也不順謂若逆昭穆流放也討誅也律法也孔氏曰岱東嶽泰山郭璞云在奉高縣西北宗尊也岱為五嶽之首故尊燔柴以祭上天而後望祀山川覲謂見東方諸侯其見之禮按覲禮云諸侯覲於天子為宮方三百步四門壇十有二尋深四尺王巡守至于方嶽之下諸侯會之亦為此宮以見之也到方嶽見諸侯之後問百年者就見之若未至方嶽於道路有百年者王亦先見之故祭義云天子巡守先見百年者又云八十九十者東行西行者弗敢過道經之則見之則百年者道雖不經所在就見之也大師是掌祭之官令各陳其國風之詩以觀君政之善惡命典市之官進

納物賈之書以觀民之所好惡若民志淫邪則愛邪僻之物由在上教之不正此以民俗知君上善惡也典禮之官於周則大史也考校四時及十二月之大小時有節氣早晚月有弦望晦朔考之使各當其節又正定甲乙之日也陰陽之律玉帛之禮鐘鼓之樂及制度衣服各有等差當正之使正也堯典云協時月正曰同律度量衡文小異而意同山川是外神不舉則為不敬山川在其國竟故削以地宗廟是內神不順則為不孝宗廟可以表明爵等故紕以爵禮樂雖為大事非切急所須故以為不從君惟流放制度衣服是政治之急故以為畔君須誅討此四罪先輕後重長樂陳氏曰紫望先於覲諸侯尊神也見百年先於陳詩納賈貴老也尊神而後貴老貴老而後觀民陳詩納賈所以觀在下之所尚考時月至於制度衣服所以觀在上之所行言禮與制度則衣服舉矣又言衣服者蓋民德之不壹僭亂之所起常在於衣

服之間尤在致詳也不敬則無禮不孝則不仁不從與畔則不道無禮未至於不仁不孝未至於不道此所以削地而後絀爵絀爵而後流討也削絀流討而繼之以加地進律者退不肖然後可以進賢也易之大有先遏惡而後揚善方氏曰天之高故燔柴以上達山川之遠故望而祀之皆告至也就見百年者乞老者之言也詩足以見民風而知上政之得失故命大師陳詩焉民之所志所好不必皆淫辟然納賈而觀之所以防其淫辟也王者頒歷以一天下正朔歷久不能無差故巡守則考時月定日焉律禮樂制度衣服欲其同出於天子同則正同之所以正之也神祇衆矣止以山川言蓋諸侯祭名山大川之在其地者其所守以山川為大也天曰神地曰祇此以山川為神祇者其無所屈皆可謂神其有所別皆可謂祇也不從未至於畔特不從而已流則放之惟其所之討則以法致其誅焉夫巡守所以同律禮樂制度衣

服止之也則其變禮易樂革制度衣服者必流討其
君宜為過哉有功於民則如地有德於民則進律孟
子所謂慶以地樂記所謂天子之為樂也以賞諸侯
此非如地於有功進律於有德者乎馬氏曰如地者
益以地也進律者進以爵也夫有德者進以爵而以
律言之何也蓋律之為言法也進爵皆以法而進之
若子男以五為節則進之以七侯伯以七為節則進
之以九此所以謂之律也應氏曰王制所記四巡之
禮與帝典所載無甚相遠也然帝者所行勢五玉脩
五禮如五器上下交際之儀溫乎其可挹也王制所
至以削絀流討之罰警於先以如地進律之賞誘於
後賞罰黜陟之政凜乎其甚嚴也夫舜豈全無黜陟
哉特其德勝而不深恃夫法焉爾世之
淳漓治之繁簡德之盛衰於此可觀矣

五月南巡守至于南嶽如東巡守之禮

孔氏曰南嶽衡山郭璞云在衡陽湘南縣南一名霍山漢武帝以衡山遼曠徙南嶽之神於廬江霍山在今廬江潛縣西澄曰如東巡守之禮者謂柴而望祀山川至加地進律等事並與東巡守之時同下文西巡守北巡守放此

八月西巡守至于西嶽如南巡守之禮

孔氏曰西嶽華山郭璞云在弘農華陰縣西南

十有一月北巡守至于北嶽如西巡守之禮

孔氏曰北嶽恒山郭璞云在常山上曲陽縣西北

歸假于祖禰用特

假音格禰乃禮切

鄭氏曰假至也特特牛也祖下及禴皆一牛孔氏曰堯典云歸格于藝祖用特祖既用特從祖下及禴廟各用一牛也程子曰但止就祖廟共用一牛不如時祭各於其廟也

○天子將出征類乎上帝宜乎社造乎禴禴於所征之地受命於祖受成於學出征執有罪反釋奠于學以訊

讖告

禴馬怕切又音百
訊音信讖古獲切

鄭氏曰類宜造皆祭名其禮亡禴師祭也為兵禱其禮亦亡受命於祖告祖也受成於學定兵謀也釋菜奠幣禮先師也訊讖所生獲斷耳者詩曰執訊獲醜又曰在類獻讖孔氏曰非時祭天謂之類若以攝位巡守事告天亦謂之類不皆為師祭受命於祖謂出時不敢自專有所稟承祖禴皆告以祖為尊故特言

祖即上文造乎禰也造禰據出行之時告行而言受命據征伐之事本初時受命而言受成於學謂在學謀論兵事好惡可否其謀成定受此成謀於學也出師征伐執有罪之人還反而歸釋菜奠幣於學謂以訊讖告先聖先師也訊言也是生而可言問者讖是死而讖耳者

○天子將出類乎上帝宜乎社造乎禰諸侯將出宜乎

社造乎禰

造七報切

孔氏曰此將出謂巡守初出時也類乎上帝祭告天地宜乎社者隨宜而告巡行方事誅殺封割應載社主令誅罰得宜也造乎禰者造至也謂至父祖廟也前歸既假祖禰此出亦必歷至七廟告祖禰也今唯云禰者白虎通云從卑不敢留尊者之命至禰不嫌不至祖也皇氏云行必有主無則主命載于齊車書

云用命賞于祖是也出辭別先從卑起最後至祖仍取遷主則行也諸侯將出朝王及自相朝盟會征伐之事不得告天故從社始亦載社主及造乎禩亦告祖載主也方氏曰前言巡守之歸而不言出此言出而不言歸互相備也宜造則諸侯之所同類上帝則天子之所獨者諸侯以天子為天也

○諸侯之於天子也比年一小聘三年一大聘五年一

朝

朝音潮下同

鄭氏曰比年每歲也小聘使大夫大聘使卿朝則君自行然此大聘與朝晉文霸時所制也虞夏之制諸侯歲朝周之制侯甸男采衛要服六者各以其服數來朝也孔氏曰按聘禮記小聘曰問大聘使卿介五人其小聘使大夫唯三介昭三年傳鄭子大叔曰文襄之霸也其務不煩諸侯今三歲而聘五歲而朝故

鄭云晉文霸時所制也長樂陳氏曰聘義比年小聘三年大聘周官大行人諸侯之邦交歲相問殷相聘也澄曰書言五載一巡守羣后四朝謂不當巡守之年每年一方之諸侯來朝周而復始則是各方諸侯每五年而一朝京師也

○天子無事與諸侯相見曰朝考禮正刑一德以尊于天子

鄭氏曰事謂征伐孔氏曰諸侯相與朝正之時考校禮儀正定刑法專一道德以尊崇天子不言樂者禮中燕之長樂陳氏曰春秋書滕侯薛侯來朝穀梁傳云天子無事與諸侯相朝也攷禮脩德所以尊天子也其言蓋本此周官凡諸侯之邦交歲相問也殷相聘也世相朝也若夫天子無事則與之相朝不特世

而已考禮所以杜其僭僻正刑所以防其溢暴一德所以同其趣向如此則禮刑正而無異政之國道德一而無異教之民此尊天子之道也澄曰諸侯見於天子者也不可言天子與諸侯相見相見乃敵體之離此蓋言天子無事之時諸侯得與諸侯相見其禮曰相朝若天子有兵事喪事則諸侯奔趨王事而無暇於自相朝也舊注以此曰朝為朝天子獨陳氏據穀梁傳以為諸侯相朝之朝比舊注為優

○天子賜諸侯樂則以祝將之賜伯子男樂則以鼗將

之

祝昌六切
鼗音桃

鄭氏曰祝鼗皆所以節樂將謂執以致命孔氏曰凡與人物置其大者於地執其小者以致命於人將行也謂執以行命按漢禮器制度祝狀如漆簡中有椎將作樂先擊之鼗如小鼓長柄傍有耳握之使自擊

祝之節樂節一曲之始其事寬故以將諸侯之命
鼓所以節一唱之終其事狹故以將伯子男之命

諸侯賜弓矢然後征賜鈇鉞然後殺賜圭瓚然後為鬯

未賜圭瓚則資鬯於天子

鈇芳于切又音斧鉞音
瓚瓚才旦切鬯勑亮切

鄭氏曰得其器乃敢為其事瓚鬯爵也鬯拒酒也孔
氏曰賜弓矢謂八命作牧者侯伯有功德加命得專
征伐當州之內若九命為二伯則得專征一方五侯
九伯也七命以下不得弓矢之賜則以兵屬於得專
征伐者賜鈇鉞謂上公九命者賜鈇鉞然後得專討
晉文公雖受賜弓矢不受鈇鉞不得專殺故執衛侯
歸之於京師賜圭瓚亦謂上公九命者若未賜圭瓚
則用璋瓚鬯者釀秬黍為酒和以鬯金之草謂之鬯
鬯不以鬯和則
直謂之鬯而已

天子命之教然後為學小學在公宮南之左大學在郊

鄭氏曰學所以學士之宮此小學大學殷之制尚書傳曰百里之國二十里之郊七十里之國九里之郊五十里之國三里之郊孔氏曰此殷制故鄭引書傳明之若周制則天子畿內千里百里為郊遠郊上公五十里侯伯三十里子男十里近郊各半之方氏曰命之教然後為學所以一道德也王氏曰學固不可一日無然其教不可不資之天子資之天子道德所以一也

天子曰辟廱諸侯曰類宮

辟音璧類音泮

孔氏曰辟廱築土雖水之外圓如壁類宮類之言半以南通水北無也澄曰按詩大雅靈臺篇言於樂辟廱文王有聲篇言錫京辟廱魯頌泮水篇言在泮飲酒然皆未有以見其必為學宮之名也

右記巡守朝聘凡六節

天子諸侯無事則歲三田一為乾豆二為賓客三為充
君之庖無事而不田曰不敬田不以禮曰暴天物

乾音
干庖

步交
切

鄭氏曰三田者夏不田蓋夏時也周禮春曰蒐夏曰
苗秋曰獮冬曰狩乾豆謂腊之以為祭祀豆實也庖
今之厨也不敬者簡祭祀畧賓客孔氏曰無事謂無
征伐出行喪凶之事則一歲三時田獵獵在田中又
為田除害故稱田也商以夏是生養之時又觸其夏
名故不田此取春秋緯運斗樞之文又云歲三田謂
乾豆以下三事也一為乾豆豆實非脯而云乾者謂
作醢及鶩先乾其肉上殺者也二為賓客中殺者也

三充君庖下殺者也范甯云上殺中心死速乾之以為豆實次殺射髀髀死差遲故為賓客下殺中腸汚泡死最遲故充庖厨又毛傳云自左膝而射之達於右腸為上殺射右耳本次之射左髀達於右髀為下殺先宗廟次賓客尊神敬賓也田不以禮則殺傷過多暴害天物也方氏曰事謂喪荒之類於無事之歲然後田其田也有節矣春蒐夏苗秋獮冬狩田之時有四乾豆賓客充君之庖田之事有三故曰三田與易言田獲三品同義公羊氏謂夏不田誤矣三田之序先神而後人先人而後己

天子不合圍諸侯不掩羣天子殺則下火綏諸侯殺則

下小綏大夫殺則止佐車佐車止則百姓田獵

綏鄭讀為綏

馬氏曰此田以禮之事也鄭氏曰合圍掩羣為盡物也綏當為綏綏有虞氏之旌旗注毛牛尾於扛首所

謂大麾也。下謂弊之佐車。驅逆之車。孔氏曰：天子四時田獵，皆得圓，但不合爾。若諸侯惟春田不圓，夏、秋、冬皆得圓，亦不合爾。故曲禮云：國君春田不圍，澤此諸侯是畿內諸侯為天子大夫者，故曲禮云：大夫不掩羣，以熊氏說綏是登車之索。綏是旌旗之無旒者，周謂之大麾。周春夏田用綏，弊謂仆於地也。初殺時，則抗之，已殺獵止，則弊之。故詩傳云：天子發抗大綏，諸侯發抗小綏。綏以表天子諸侯之獲也。驅逆之車，驅出禽獸，使趨田逆，要不得令走。按大司馬云：車弊謂驅獸之車止也。大夫殺則止，佐車則天子諸侯殺未止，佐車也。天子殺然後諸侯殺，諸侯殺然後大夫殺，大夫殺然後百姓田獵。方氏曰：合國謂合藪澤而圍之，掩羣則掩禽獸之羣而已。田車之有綏，田者執之以升降也。田車之有佐田者，用之以驅逆也。既殺而獲禽獸，則下綏示不復有升降之節也。止佐車示不復為驅逆之備也。於大夫言佐車，則天子諸侯所

下之綏皆正車也以大綏言天子以小綏言諸侯以
佐車言大夫所以別歟佐車止則百姓田獵者蓋尊
卑先後之序也言百姓而不及士士卑與百姓不必
為序也曰田又曰獵其實一也廬陵胡氏曰綏登車
索也已殺獵止之時不復驅車故下之謂執綏不抗
而弛綏也詩傳云天子發抗大綏諸侯發抗小綏抗
謂不下也按明堂位夏后氏之綏鄭云綏當作綏彼
論旌旗以綏為綏可也此論獵止弛綏及止佐車皆
是一類不必
易為綏也

獺祭魚然後虞人入澤梁豺祭獸然後田獵鳩化為鷹
然後設罝羅草木零落然後入山林昆蟲未蟄不以火
田不麝不卵不殺胎不殀天不覆巢

罝音尉一音鬱
麝音迷卵力管切殀

大上於表切下鳥
老切覆芳服切

鄭氏曰取物必順時候也梁純水取魚者爵小網也
麋卵胎天未成物重傷之也殄斷殺少長曰天覆敗
也孔氏曰月令正月獺祭魚孝經緯曰獸蟄伏獺祭
魚則十月中也是獺一歲再祭魚此下鳩化為鷹草
木零落文相接連則謂十月時正月雖獺祭魚虞人
不得入澤梁也月令九月豺祭獸夏小正十月豺祭
獸則是九月末十月初也豺祭獸後百姓可以田獵
鳩化為鷹有漸月令季夏鷹乃學習孟秋鷹乃祭鳥其鳩
化為鷹則八月時也爵捕鳥網也鳥罟謂之羅月令
季秋草木黃落草木零落謂十月時故詩傳云草木
不折不操斧斤不入山林此謂官民總取材木之時
也昆蟲未蟄謂未十月時十月則得火田矣從十月
以後至仲春皆得火田故司馬職云春火弊也延平
周氏曰獺祭魚而下主言秋冬不麝不卵而下主言

春夏方氏曰不覆巢者惡傷其孚
乳巢以仰承為順故以不覆言之

右記田凡一節

天子七日而殯七月而葬諸侯五日而殯五月而葬大
夫士庶人三日而殯三月而葬

鄭氏曰尊者舒卑者速春秋傳曰天子七月而葬同
軌畢至諸侯五月同盟至大夫三月同位至士踰月
外姻至孔氏曰天子諸侯位尊送終禮物其數既多
身在於喪許其申遠故日月緩也大夫及士既卑送
終之物其數簡少又職唯促遽義許奪情故日月
促也必至三日者冀其更生三日不生亦不生矣

三年之喪自天子達

中庸曰父母之喪無貴賤一也鄭氏曰
下通庶人於父母同天子諸侯降期

庶人縣封葬不為雨止不封不樹喪不貳事

縣音玄封
彼念切不

為于偽切
不封如字

鄭氏曰縣封當為縣寔至卑不得引絛下棺雖雨猶
葬以其禮儀少封謂聚土為墳不封不樹卑無飾也
周禮曰以爵等為邱封之度與其樹數則士以上乃
皆封樹貳之言二也庶人終喪無二事不使從政也
喪大記曰大夫士既葬公政入於家既卒哭弁絰帶
金草之事無辟也孔氏曰士雖無碑猶有二緯庶人
賤惟縣繩下棺故云縣寔威儀既少日又促遽將葬
之時不為雨止不積土為封不標墓以樹卑不須顯
異也有爵者乃有封邱王公曰邱諸臣曰封漢律列
侯墳高四丈關內侯以下至庶人各有差孔子合葬

於防崇四尺蓋周之士制也其樹數白虎通云天子松諸侯柏大夫栗士槐士以上負國恩重雖在喪中金革無辟庶人既無爵命三年之內許其終喪除居喪外不供它事注引喪大記者證大夫士在喪有二事也王氏曰喪不貳事謂凡有喪者皆不貳事非專言庶人三年不從政所謂不貳事使壹於喪事也金革無辟上使之非也亦推制也

自天子達於庶人喪從死者祭從生者支子不祭

中庸曰斯禮也達乎諸侯大夫及士庶人朱子曰制為禮法以及天下使葬用死者之爵祭用生者之祿鄭氏曰從死者謂衣衾棺槨從生者謂祭之牲器孔氏曰盧植云按小記士祔於大夫則易牲其妻為大夫而卒而後其夫不為大夫而祔於其妻則不易牲又雜記上大夫之虞也少牢卒哭成事祔皆大牢下

大夫之虞也。牲牲卒哭成事，祔皆少牢。是喪中之祭，虞祔練祥，乃從死者之爵，除服後吉祭，則以子孫官祿祭其父祖。故云從生者，長樂陳氏曰：支子雖不祭，而有所謂祭，故宗子為士庶子為大夫，則以上牲祭於宗子之家。

○喪三年不祭，唯祭天地社稷，為越紼而行事。

紼音弗。

鄭氏曰：不敢以卑廢尊也。越，猶躡也。紼，輶車索也。山陰陸氏曰：不祭，謂宗廟爾。即天地社稷，雖未葬，猶祭之。是之謂越紼。若五祀，蓋亦不廢。孔氏曰：私喪，卑天地社稷，尊雖遺私喪，既殯已後，若有天地社稷之祭，即行之。未葬之前，屬紼於輶，以備火災祭天地社稷，須越躡此紼而往祭，所故云越紼六宗山川之神，則否。其宮中五祀在喪內，則亦祭之。但祭時不須越紼，蓋五祀宮中之神，喪時朝夕出入所祭，不為越紼也。

藍田呂氏曰人事之重莫重於哀死故有喪者之毀如不欲生大功之喪業猶可廢喪不貳如此則祭雖至重亦有所不可行蓋祭而誠至則忘哀祭而誠不至不如不祭之為愈後世哀死不如古人之隆故多疑於此張子曰居喪廢祭禮有總不祭之文方喪之初雖功總如何可祭又豈可三年廢祖先之祭久而哀殺可齊則便可祭以人情酌之三年之喪期可祭暮之喪既葬可祭總功之喪踰月可祭當服祭服祭之各以其盛服祭祭罷反喪服至如古者卒哭練乃祔似有喪服入廟之禮然今則不可須三年除喪乃祔越縗而行事則是猶在殯宮於時無由可致齊又安能脫喪服衣祭服縱天地之祀不可廢則止可使冢宰攝爾昔者英宗初即位有人以此問正叔正叔謂古人居喪百事皆如禮雖廢祭祀可也今人百事皆如常特於祭祀廢之則不若無廢為愈也子厚正之曰父在子為母喪則不敢見其父不敢以非禮見

也今天子為父之喪以此見上帝是以非禮見上帝也故不如無祭朱子曰古人居喪衰麻之衣不釋於身哭泣之聲不絕於口其出入起居言語飲食皆與平日絕異故宗廟之祭雖廢而幽明之間兩無憾焉今人居喪與古人異卒哭之後遂墨其衰凡出入居處言語飲食與平日之所為皆不廢也而獨廢此一事恐有所未安竊謂欲處此義者當自省所以居喪之禮果能一一合於古禮即廢祭無可疑若他事不免墨衰出入或其他有所未合者尚多即卒哭之前不得已準禮且廢卒哭之後過四時祭日以衰服持祀於几筵用墨衰常祀於家廟可也但卒哭之期須既葬三虞之後卜日而祭以成事方可爾若神柩猶在而以百日為斷墨衰出入則決然不可澄曰朱子謂卒哭後過四時祭日以衰服特祀於几筵墨衰常祀於家廟按凶服不可以接神况墨衰乃世俗非禮之服豈可服之以祀家廟且喪禮卒哭而祔之後直

至小祥方有祭豈容中間又於四時祭日而特祀几筵者乎此說亦與家禮不合蓋一時未定之言也

右記喪凡一節

天子七廟三昭三穆與太祖之廟而七諸侯五廟二昭二穆與太祖之廟而五大夫三廟一昭一穆與太祖之廟而三士一廟庶人祭於寢

鄭氏曰此周制七者太祖及祧與親廟四大祖后稷也諸侯太祖謂始封之君大夫太祖謂別子始爵者大傳曰別子為祖是也雖非別子始爵者亦然士一廟謂諸侯之中士下士名曰官師者上士二廟庶人祭於寢適寢也方氏曰天子廟七即祭法所言廟王考皇考顯考祖考廟及二祧是也諸侯五則以無

二祧也大夫三則以顯考祖考無廟也士一廟則以王考又無廟也然祭法言適士二廟而此不言者主於降殺以兩而畧之也庶人無廟則祭於寢石林葉氏曰自考而上曰考曰王考曰皇考曰顯考即高祖高祖而上謂之二祧合為七廟朱子曰劉歆之說謂三昭三穆與大祖之廟而七文武為宗不在數中蓋周自武王克殷即增二廟於二昭二穆之上以祀高祖亞祖通遷至懿王時則文王親盡而以有功當宗故別立一廟於三昭之武王親盡而亦以有功當宗故別立一廟於三昭之上謂之武世室

天子諸侯宗廟之祭春曰禘夏曰禘秋曰嘗冬曰烝天子殖禘祫禘祫嘗祫烝諸侯禘則不禘禘則不嘗嘗則

不烝烝則不禘諸侯禘牲禘一牲一祫嘗祫烝祫

禘今讀曰

祠禘今讀曰禘後並同牲音特

鄭氏曰此蓋夏殷之祭名周則改之春曰祠夏曰禘以禘為殷祭詩小雅曰禘祠烝嘗于公先王此周四時祭宗廟之名孔氏曰此云春祠夏禘而郊特牲祭義云春禘趙氏曰禘非時祭之名漢儒見春秋惟兩度書禘一春一夏所以或謂之春祭或謂之夏祭諸侯禘則不禘以下亦緣見春秋中惟有禘烝嘗三祭謂魯惟行此三祭遂云爾澄曰按此春夏祭名是記者之誤章內禘禘二字雖未改易禘皆當讀為祠禘皆當讀為禘牲謂分祭於各廟祫謂合祭於祖廟記者以天子惟春時分祭夏秋冬三時並合祭諸侯四時之祭每年必缺其一一年止有三祭春祭亦如天子之牲秋祭冬祭亦如天子之祫惟夏祭或牲或祫

不同今既無從考據疑古制未必然蓋記者妄傳輕信而云也

大夫士宗廟之祭有田則祭無田則薦

延平周氏曰有田則祭無田則薦言牲穀器皿衣服不備不敢以祭也鄭氏曰有田者既祭又薦新祭以首時薦以仲月士薦牲用特豚大夫以上用羔所謂羔豚而祭百官皆足孔氏曰士喪禮有薦新如朔奠故知既祭又薦新也儀禮有地之士用特牲無地之士宜貶降不用成牲故用特豚也諸侯大夫有地祭者用少牢其無地薦者則用羔長樂陳氏曰祭以致禮而有常月薦以致孝而無常時祭必卜日而薦新不擇日祭有尸而薦無尸以至奠而不祭有時物而無三牲黍稷此薦新之大畧也

庶人春薦韭夏薦麥秋薦黍冬薦稻韭以卵麥以魚黍

以豚稻以鴈

鄭氏曰庶人無常牲取與新物相宜而已孔氏曰相宜者謂四時之間此牲此穀兩物俱有非謂氣味相宜若牛宜稌羊宜黍之屬也長樂陳氏曰鴈魚豚鴈以時之所宜論則春宜豚冬宜鮮此則秋以豚夏以魚以物之相宜論則羊宜黍豕宜稷鴈宜麥魚宜苽此則黍以豚麥以魚蓋魚之於夏豚之於秋鴈之於冬尤多而易得庶人之薦不過致其易得者月令季秋薦稻稻常獲於十月而天子以前此者為貴故與異庶人

○天子祭天地諸侯祭社稷大夫祭五祀天子祭天下名山大川五嶽視三公四瀆視諸侯諸侯祭名山大川

之在其地者天子諸侯祭因國之在其地而無主後者

馬氏曰天地氣形之最大者也而天子者域中之所尊故祭天地社稷土穀之神也而諸侯者為天子守土故祭社稷大夫則有家故祭五祀在上者可以兼下故天子祭天地及社稷五祀諸侯祭社稷及五祀在下者不可以兼上故諸侯祭社稷而不得祭天地大夫祭五祀而不得祭社稷古之祀典有功於民則祀之名山大川有功於民民之所取材用也天子君天下而其所報者衆故祭天下之名山大川諸侯君一國而所報者寡故祭名山大川之在其地者秦溪楊氏曰五嶽視三公四瀆視諸侯特言其禮有隆殺重輕爾注疏拘於牲幣粢盛邊豆爵獻之數失於大泥鄭氏曰視三公視諸侯視其牲器之數也諸侯祭名山大川若魯人祭泰山晉人祭河是也澄曰祭法云大夫以下成群立社曰置社盖大夫以下所得祭

者民社不得祭國社也孔氏曰天子置都之所及諸侯所封之內皆因古昔先王先公所居之地今其地子孫絕滅而無主後者則天子諸侯祭之

天子社稷皆大牢諸侯社稷皆少牢祭天地之牛角繭

栗宗廟之牛角握賓客之牛角尺

大音泰少詩照切

方氏曰大牢具牛羊豕以其大故曰太少牢則羊豚而已以其小故曰少天子之社稷主天下之土穀故用大牢以祭諸侯之社稷主一國之土穀故用少牢以祭山陰陸氏曰繭栗言雖如栗亦可以著鄭氏曰握謂長不出膚孔氏曰四指曰扶扶則膚也延平周氏曰祭天地宗廟及賓客用牛不同以純而未散者為上

○諸侯無故不殺牛大夫無故不殺羊士無故不殺犬

豕庶人不食珍

鄭氏曰故謂祭饗孔氏曰諸侯祭以大牢得殺牛諸侯之大夫祭以少牢得殺羊天子大夫祭亦得殺牛其諸侯及大夫饗食賓得用牛也長樂陳氏曰小司徒有飲食之禁令則諸侯無故不殺牛以至庶人無故不食珍者之禁令也

庶羞不踰牲燕衣不踰祭服寢不踰廟

鄭氏曰羞不踰牲謂祭以羊則不以牛肉為羞也張子曰不踰不豐於牲也傳者以品之不踰非也牲體少而羞掩豆是之謂踰牲庶羞不踰牲謂多少不謂用羊而不用牛也石林葉氏曰庶羞常薦而踰牲燕

衣常用而踰祭服寢所常
安而踰廟禮皆不與也

大夫祭器不假祭器未成不造燕器

孔氏曰皇氏云此謂有地大夫故祭器不假若無地
大夫則當假之故禮運云大夫祭器不假聲樂皆具
非禮也謂無地大夫也長樂陳氏曰無田祿者不假
祭器故禮運以祭器不假為非有田祿者必具祭器
故王制以祭器不假為禮君子營宮室則先宗廟造
器則先祭器延平周氏曰庶人共祭器而大夫則不
假者以其家邑足以具之也祭器
未成不造燕器者先神而後人也

右記祭凡三節

禮記纂言卷七